



一屋


一百九


永樂大典


卷一萬九千七百八十九
之一萬九千七百九十

Presented by Professor Herbert A. Giles

April 13. 1901









永樂大典卷之一萬九千七百八十九

一屋

服 元服二

太子加元服杜佑通典周制天子元子猶士也。天下無生而貴者也。元子嗣子也。無生而貴。皆由下升也。明人有賢行著德。乃得貴之。家語冠頌曰。天子之冠。擬諸侯之冠。四加。宣帝冠太子以正月。冠諸王。遣使行事。漢書。宣帝五鳳元年正月。皇太子冠。皇太后賜丞相將軍列侯中二千石。帛人百疋。太夫人八十疋。夫人六十疋。又賜列侯嗣子爵。五大夫男子為父後者爵一級。太平御覽孝哀皇帝庶孫定陶恭王子也。嗣立為王。好文辭法律。元延四年入朝。盡從傅相中尉。時成帝少弟中山孝王亦來朝。獨從傅。上以問定陶王。對曰。令諸侯王朝得從其國二千石。傅相中尉皆國二千石。故盡從之。上令誦詩。通習能說。他日問中山王獨從傅。在何法令。不能對。帝由此賢定陶王。數稱其材。為加元服而遣之。時年七十矣。明年徵立為皇太子。謝曰。臣幸得繼父守藩。為諸侯王。材質不足以假充太子宫。杜佑通典魏氏冠太子。再加。皇子王公嗣子乃三。孫毓以為一加。再加。非禮。

也。冠諸王。因漢遣使行事。晉惠帝之為太子將冠。武帝臨軒。使兼司徒。高陽王珪加冠。兼光祿大夫。屯騎校尉。華廩贊冠。武惠冠太子。冠訖。皆即廟見。斯亦擬在廟之儀。太始六年。南宮王承。年十五。依舊應冠。有司奏議禮。十五成童。國君十五而生子。以明可冠之儀。又漢魏遣使冠諸王。非古典。於是制儀。王十五而冠。遂革使命。咸寧二年秋閏九月。遣使冠汝南王。東惠帝以正月景午冠太子訖。乃廟見。懷帝亦以正月冠皇太子。宋冠皇太子。及蕃王以一加。冊府元龜。宋孝武帝。孝建元年正月丙寅。立皇子業為皇太子。即前廢帝也。未之東宮中庶子二。率並入直永福省。大明二年。出居東宮。七年加元服。杜佑通典。齊武帝孫南郡王昭業冠。從尚書令王儉議。使太常持節一加冠。大鴻臚為贊醮酒之儀。國官陪位拜賀如常。其日內外二品清官以上。詣公車門集賀。并詣東宮南門通牋。別日上禮。官臣亦詣門稱慶。如上臺之儀。既冠之後。尅日謁廟。儉議曰。皇孫冠事。歷代所無。禮雖有嫡子無嫡孫。然南郡王。體自儲暉。實惟國重。元服之典。宜異列蕃。依於諸王則輕。同於儲皇則重。按士冠禮。主人玄冠朝服。注云。主人冠者之父兄也。尋其言父及兄。則明祖在不為主也。又春秋之義。不以父命辭王。父命。則皇太子無專用之道。宜使太常持節一加冠。并

撰立贊冠醮酒二辭不依蕃國詔可也。祝辭曰。皇帝使給事中太常武安侯蕭惠本加南郡王冠。筮日戒賓。肇加元服。棄爾幼志。從厥成德。親賢使能。克崇景福。醮酒辭曰。旨酒既清。嘉薦既盈。兄弟具在。淑慎儀形。永永眉壽。於穆斯寧。明帝冠太子用正月。梁武帝天監十三年正月。冠太子於太極殿。修前代之儀。太平御覽。梁書曰。天監十四年正月朔旦。帝臨軒。冠太子於太極殿。舊制太子着遠遊冠。金蟬翠綵纓。至是詔加金博山。冊府元龜。陳文帝天嘉六年正月甲午。皇太子加元服。至德二年七月壬午。太子加元服。杜佑通典。後魏孝文帝冠皇太子。恂於廟。詔曰。司馬彪漢志。漢帝有四加冠。一緇布。二進賢。三武弁。四通天。朕見家冠頌篇。四加冠公也。家語孔子之言。與正經何異。諸儒忽司馬彪志。致使天子之子而行士冠。朕以為有賓。諸儒皆以為無賓。孔氏所云。斐然成章。其斯之謂矣。北史。太和十七年六月。立皇子恂為皇太子。及冠。恂於廟。帝臨光極東室堂。引恂入見。誠以冠義曰。夫冠禮表之百代。所以正容體。齊顏色。順辭令。容體正。顏色齊。辭令順。故能正君臣。親父子。和長幼。然母見必拜。兄弟必敬。責以成人禮。字汝元道。所寄不輕。汝當尋名求義。以順吾旨。北齊制。皇太子冠。則太尉以制幣告七廟。擇日臨軒。有司供帳於崇正殿中。嚴皇太子空頂幘。公服出立東階之南。西面。使者入立西階之南。東面。受訖入室盥櫛。出南面。使

者進揖諸冠席西面坐。光祿卿盥訖詣太子前跪櫛。使者又盥奉進賢三梁冠。至太子前東面祝脫空頂幘加冠。太子興入室更衣。出又南就席。光祿卿盥櫛。使者又盥祝脫三梁冠。再加遠遊冠。太子入室更衣。設席中楹之西。使者揖就席南面。光祿卿洗爵酌醴。使者詣席前北面祝。太子拜受醴。即席座祭之。啐之。尊爵降階復本位西面。三師三少及在位群官拜事訖。又擇日會宮臣。又擇日謁廟。冊府元龜後周高祖武帝建德元年四月立魯國公。贛為皇太子。即宣帝也。帝親告廟。冠於祚階。隋書皇太子服六等袞冕。九旒。朱組纓。青纁充耳。犀簪導。紺衣纁裳。去日月星辰為九章。白紗內單。黼黻領。青標襪。裾革帶。金鉤鞞。二章玉具劍。侍從祭祀及謁廟加元服。納妃則服之。據晉咸寧四年故事。衣色用玄。改用紺。舊章用織成。降繡。玉具劍。故事以火珠鏢首。改以白珠。開皇中皇太子冕同天子。貫白珠。及仁來元年。煬帝為太子。以白珠太。逼表。請從青珠。於是太子袞冕與三公五等皆青珠。九旒。旒短不及髀。降天子二寸。杜佑通典隋制。皇太子將冠。前一日帝齋於大興殿。太子與賓贊及令從官齋於正寢。其日質明。有司告廟。各設筵於祚。帝袞冕。即御座。揖太子進。筵西向坐。贊冠者坐櫛。設纁。賓盥訖。初

加緇布冠。進設頗。丘癸切。纓。賓揖太子適東序。衣玄衣素裳。以出。贊者又坐櫛。賓進加遠遊冠。改服訖。賓又受冕。太子適東序。改服以出。賓揖。太子南面立。賓受醴。進筵前北面立。祝之又切。太子拜受。解。賓復位。東面答拜。贊者奉饌於筵前。太子祭奠。禮畢降筵。進當御東面。拜。納言承詔。詣太子戒訖。太子拜。贊者引太子降自西階。賓少進。字之贊者。引太子進立於庭東面。諸親拜訖。贊者拜。太子皆答拜。與賓俱復位。納言承詔。降命令有司致禮。賓又拜帝。復降作階下拜太子。以下皆拜。帝出更衣還宮。太子從至闕。因入見皇后而還。大唐貞觀五年正月。有司上言。皇太子將冠。禮宜用二月為吉。請遣兵以備儀注。太宗曰。今東作方興。恐妨農事。今改用十月。太子少保蕭瑀奏稱。准陰陽家。用二月為勝。上曰。陰陽拘忌。朕所不行。若動靜必依陰陽。不顧禮義。欲求福祐。其可得乎。若所行皆遵正道。自然當與吉會。且吉凶在人。豈假陰陽拘忌。農時甚要。不可蹙失。開元六年。侍中宋璟上表曰。臣伏以太常狀。准東宮典記。有上禮之儀。謹按上禮非古。從南齊後。魏方始有此事。而垂拱神龍。更扇其道。群臣斂錢獻食。君上厚賜答之。姑息施恩。方便求利。皇太子冠。乃盛禮自然。合有錫賚。上臺東宮兩處。宴會非不優厚。其上禮宜停其儀。具開元禮。唐

會要貞觀八年二月三日皇太子加元服。永徽六年二月五日皇太子加元服。內外文武官為父後者賜爵一級。顯慶四年十月丙午皇太子加元服。後薨。謚字敬皇帝。開元六年侍中宋璟上表曰。臣伏以太常狀以皇太子冠。准東宮典記。有上禮之儀。謹按上禮非古。從南齊後魏始。有此事。而垂拱神龍。更扇其道。群臣歛錢獻食。君上厚賜答之。姑息施恩。方便求利。每緣一事。有此。再煩齊魏。乃吳虜之風。故不足效。後車輒有前車之戒。應當取適皇太子冠。乃盛禮自然。合有錫賚。上臺東宮兩處。宴會非不優厚。其上禮宜停。冊府元龜開元七年十一月。皇太子將加元服。下制曰。元良所以主七鬯。奉社稷。貞于萬國。祝以三加。皇太子居長德之地。務親仁之道。爰就師保。克修志業。寢門問安。而資敬。太學齒胄。而徵善。大猷且酌。元服宜申。史稱周頌之年。傳記魯哀之禮。粵若敬始。謂之成人。逮茲建王。式展嘉事。可以來年正月加元服。所司擇日奏聞。禮官博士詳考。故實。允符令典。唐會要開元八年正月十一日。皇太子將加元服。十二日。太子謁太廟。十三日。宴百官於太極殿。杜佑通典皇太子加元服。告太廟。臨軒命賓贊。所司先奏。請司徒一人為賓。卿一人為贊。冠。吏部承以戒之。前一日尚舍奉御。整飾御幄於太極殿。衛尉設群官朝集。使諸蕃客。

次於左右朝堂。太樂令展官懸之樂於殿庭。設舉麾位於殿上。一位於懸
 下。鼓吹令設十二按。乘黃令陳車輅尚輦。奉御陳輿輦典儀。設文官一品
 以下。五品以上。位於橫街之北。西面北上。諸州使人五品以上合班。六品
 以下。位於橫街南。諸州使人六品以下。諸蕃客又在南。皆西面北上。設武
 官五品以上。位於橫街北。東面北上。諸州使人五品以上合班。諸親位於
 其南。六品以下。於橫街南。諸州使人六品以下。及蕃客等。又於其南。皆東
 面北上。設典儀位於懸之東北。贊者二人在南。少退俱西向。設賓受命。位
 於橫街南。道東北面。贊者位。又於其後。少東北面。奉禮郎。設門外。文官一
 品以下。位於順天門外。道東。每等異位重行西南。武官三品以下。位於門
 西。每等異位重行東面。並以北為上。其日諸衛。勒所部。列黃麾。仗如常儀。
 群官各依時刻集朝堂。俱就次。各服其服。侍中量時版奏。請中嚴。協律郎
 太樂令師工人就位。諸侍衛之官。各服其器服。奉迎典儀。即贊者先入就
 位。通事舍人。引先置群官入立定。又引賓贊。入立於太極門外。道東西向。
 黃門侍郎。引主節持幡節。中書侍郎。引制書。按立於樂懸東南。西面北上。
 侍中版奏外辨。皇帝服通天冠。絳紗袍。以出。曲直華蓋。警蹕侍衛如常儀。
 皇帝將出。仗動太樂令。令撞黃鐘之鐘。右五鐘皆應。協律郎舉麾鼓祝。奏

水經注卷之九十三

太和之樂。皇帝升輿出自西房。即御座南向坐。符寶郎奉寶置於御座。樂止。通事舍人引賓贊入就位。賓贊初行入門。舒和之樂作。至位。樂止。立定。典儀曰再拜。侍中及舍人前承制。侍中降至賓前。稱有制。公再拜。將加冠於某之首。公其將事。公少進北面再拜稽首。辭曰。臣不敏。恐不能供事。敢辭。侍中升奏。又承制降稱制旨。某公將事無辭。公再拜。退復位。侍中退。舍人至卿前。稱勅旨。卿再拜。將加冠於某之首。卿宜贊冠。卿再拜。舍人退。黃門侍郎引主節至賓所。主節授黃門侍郎。黃門侍郎執節。立於賓東北面。賓再拜。授節付主節訖。又再拜。主節立於賓後。黃門侍郎退。中書侍郎引制書按至賓所。取制書在賓東北西面立。賓再拜。受制書執立。又再拜。持按者立於賓後。中書郎退。典儀曰再拜。贊者承傳。群官在位者皆再拜。舍人引賓贊出。賓贊初行。樂作。出門樂止。侍中前跪奏。稱侍中臣某言禮畢。俛伏興。還侍位。皇帝興。太樂令令撞蕤賓之鐘。左五鐘皆應。鼓祝奏太和之樂。皇帝降座。侍衛警蹕。如來儀。入自東房。樂止。舍人引一品以下以次出。初賓贊出門。賓以制書置於按。升車從輅而行。威儀鼓吹詣東宮降輅入。次賓贊具服。其一品以下以次出。蕃客各還館。九品以上詣東宮朝堂。次服其服。就位如冠儀。冠前一日。衛尉設賓。次於重明門外。道西南向。

贊冠次又於其西南向。並鋪牀席。又於重明門內。道西設一次。擬會賓贊。設文武群官。九品以上。及諸親并官臣。次如常儀。奉禮設文武群官。九品以上諸親。在五品之下。及官臣門外。位如常儀。典儀設殿庭位。文武群官共官臣合班。諸親在五品下。文官在東西面。武官在西東面。皆以北為上。又設皇太子位於閣外。道東西向。設三司位於閣外。道西。三少位於三師之南。少退東向。典儀又說皇太子受制位。於樂懸北。北面。所由設軒懸之樂於殿庭。又設舉麾位於庭上。一位於懸下。有司設皇太子羽儀車輿於殿庭。如常儀。典設郎帥。其屬鋪解劔席於懸之東北。冠日平明。官臣皆朝服。非官臣者公服。三師三少公服。並集於重明門外。次宗正卿乘犢車侍從。詣左春坊。權停左右。二率各勒所部屯門列仗。左庶子版奏。請中嚴工人。及諸行事之官。各入就位。奉禮郎設盥洗於東階東南。壘在洗東。篚在洗西南肆。篚實巾加勺。幕典設郎鋪皇太子冠席於殿上。東壁下。近南西向。設賓席於西階上。東向。設主人席於皇太子席西南。西向。設三師席於冠席北。三少席於冠席南。典設郎張帳幄於東序內。設褥席於帷中。又張帷於序外。擬置饌物等。內直郎陳服於帷內。東領北上。衮冕服。玄衣纁裳。九章白紗中單。黼領襟襪裙。革帶金鈎。大帶朱黻。二章。玉具劍。火珠鏤首。

瑜玉雙珮。朱組雙大綬。四綵赤白。縹紺純朱。質長一丈八尺。三百二十首。廣九寸。小綬長二尺六寸。色同大綬。而首半之。間施二玉環。白鞮赤舄。金飾象笏。遠遊冠。服絳紗袍。白紗中單。皂領襟。襪裙。白方心。曲領假帶。絳紗蔽膝。白練裙襦。白襪黑舄。其革帶劔珮綬笏。輿冕服同。緇布冠。玄衣素鞞。白紗中單。青領標。襪裙。履鞮革帶。大帶笏緇纒。用皂羅。中方六寸。屬帶於前西隅。犀簪二物同箱。在服南。櫛實於箱。又在南。莞筵四紛。純繅席四績。純又在南。良醞令實側罇。醴加勺。幕於序外。惟內設罍。在洗北。篚在洗南。東肆實中一角。解角杓各一。加幕太官令實饌。豆九。籩九。於罇西。俎在豆北。執在庭壘洗者。絳公服立於壘洗之南北向。執惟內罇。壘洗邊豆俎等。並絳公服立於罇壘籩豆之所。冕白珠九旒。犀導。組纓。青纊充耳。遠遊冠。三梁冠。金附蟬九首。施朱翠。黑介幘。犀導。肆髮纓。緇布冠。青組纓。屬於冠。冠冕各一箱。盛奉禮郎二人。各執立於階之西。東面北上。主人各贊冠者。庶子為之。升諸東序帷內。少北戶東西面立。典謁引群官以次入。就常位。初賓贊入次。左庶子版奏外辨。通事舍人引三師等入。就閣外道西位。東面立。皇太子著空頂黑介幘。雙童髻玉導。寶飾綵衣。紫褶。綠袴。織成標領。綠錦紳。烏皮履。乘輿以出。洗馬迎於閣門外。左庶子跪奏。稱左庶子臣

其言。請殿下降輿。俛伏興。還侍位。皇太子降輿。洗馬引之道東位。西向立。左庶子又前跪奏。稱左庶子臣某言。請殿下再拜。皇太子再拜。三師三少答再拜。洗馬引就階東南位。三師訓導在前。三少訓從於後。千牛仗二人夾左右。其餘仗衛列於師保之外。通事舍人引宗正卿入見。皇太子訖。通事舍人引出迎賓。洗馬引皇太子初行。樂作。至階東西面立。偃麾樂止。凡樂皆伶官師。舉麾工鼓祝而後作。偃麾戛鼓而後止。宗正卿引賓迎於門東西面。賓立於門西東面。宗正卿再拜。賓不答拜。賓入門。樂作。主人從入立於樂懸東北西面。賓入贊。冠者從入。舍人引賓贊。詣殿階間南立。樂止。贊冠者立於賓西南東面。節在賓東。少南西面。制按在贊冠西南東面。賓就按取制執。洗馬引皇太子詣受制位。北面立。皇太子初行。樂作。至位樂止。主節脫節衣。賓稱有制。皇太子再拜。宣詔曰。制皇太子某。吉日元服。率由舊章。命太尉就宮展禮。訖。皇太子又再拜。少傅進詣賓前。受制書。退授皇太子。皇太子受制書。付庶子按退。洗馬引皇太子師保等。如式升東階。量人從升。初行樂作。至階樂止。入東序帷內。近北西向立。師保等就席位。訖。賓升西階。宗正卿升東階。各主席後。初賓升。舍人引贊冠者詣壘。洗盥手。升自東階。詣序帷內。於主人贊冠之南。俱西面贊。引皇太子出立於席。

東西面。賓之贊冠者。取纒櫛二箱。坐奠於皇太子南端。興席北。少東西向立。賓揖。皇太子進升筵。西向坐。賓之贊冠者。進筵前東面坐。脫空頂黑介幘。置於箱。櫛畢。設纒興。少北南面立。賓降盥。主人從降樂作。賓升樂止。主人從升。執緇布冠者升。賓降一等受之。右執頂。左執前。進皇太子筵前東向立。祝曰。今日吉日。始加元服。棄厥幼志。慎其成德。壽考惟祺。以介景福。乃跪冠。興復位。東面立。賓之贊冠。進筵前東面跪。結纓興復位。皇太子興。賓揖。皇太子贊冠者引皇太子適東序。帷內。著玄衣素裳之服。以出。立於席東西面。賓揖。皇太子進升筵。西向坐。賓之贊冠者。進筵前東面跪。脫緇布冠。置於黑介幘之箱。櫛纒依舊不解。興復位。賓降二等受遠遊冠。右執頂。左執前。進皇太子筵前東向。祝曰。吉月令辰。乃伸嘉服。克敬威儀。式昭厥德。眉壽萬年。永受祺福。乃跪冠。興復位。賓之贊冠者。引皇太子適東序。帷內。著朝服以出。立於席東西面。賓揖。皇太子進升筵。西向坐。賓之贊冠者。進筵前東向跪。脫遠遊冠。置於纒箱。櫛纒依舊不解。興復位。賓降三等受冕。右執頂。左執前。進皇太子筵前東向。祝曰。以歲之正。以月之令。咸加其服。以成厥德。萬壽無疆。承天之慶。乃跪冠。興復位。賓之贊冠者。跪受簪。結纓興復位。皇太子興。賓揖。皇太子贊冠者引皇太子適東序。著衮冕。

之服以出。立於席東西面。贊冠者徹纒櫛二箱入於帷內。主人贊冠者又設醴。皇太子席於室戶西南向。下莞上藻。賓之贊冠者於東席。帷內盥手洗解。典善卽醴。加柶覆之。面柄。賓之贊冠受面葉。立於序內南面立。賓揖皇太子。贊冠者引皇太子就筵西南面立。賓進受醴。加柶面柄。進皇太子筵前北面立。祝曰。甘醴惟厚。嘉薦令芳。拜受祭之。以定厥祥。承天之休。壽考不忘。皇太子筵西拜受解。賓復位東面答拜。贊冠者興。進饌陳於皇太子筵前。皇太子升筵坐。左執解。右執脯。櫛於醢。祭於籩豆之間。贊冠者取籩殖。徧櫛於豆。以授皇太子。又祭於籩豆之間。贊冠者取肺一以授皇太子。皇太子奠解於薦西。興受肺。却左右執本坐繚。右手執末以祭上。左手齊之興。以授贊冠者。贊冠者加於俎。皇太子悅手興。取解以柶祭醴。三始極。一祭又極。再祭加柶於解。面葉興。筵未坐。啐醴。建柶興。降筵西南南面坐。奠解再拜。執解興。賓答拜。皇太子升筵坐。奠解於薦東。興降筵。贊冠者引皇太子降自西階。立於西階之東南面。賓初答拜訖。降立於西階之西。近南東面。引賓之贊冠者。隨降立於賓西南東面。皇太子立定。賓少進。字之曰。禮儀既備。令月吉日。昭告厥字。君攸宜。宜之於嘏。永受保之。奉勅字某。皇太子再拜曰。某雖不敏。敢不祗奉。又再拜。洗馬引皇太子降。初行樂。

作。至降阼階下位樂止。三師在南北面。三少在北南面立定。皇太子西南再拜。三師等答再拜以出。於三師拜訖。典儀曰。再拜。贊者承傳。群官在位者皆再拜。左庶子前稱禮畢。皇太子乘輿以入。侍臣從至閣。如常儀。初皇太子降。通事舍人引賓贊。及宗正出。就會所。會賓贊。賓既出。立於會所門外之西。東面北上。宗正卿。立於門東西面。立定。一揖一讓而入。宗正卿立於座東。西面。賓贊立於座西。東面。俱再拜就座。俛伏坐。遂行酒。酒至。賓主俱興。再拜就席坐飲。食至。賓主俱興。設食訖。賓主俱坐。食會訖。贊立於西廂東面。南上。宗正卿立於東廂西面。執事奉束帛之篚。以授宗正卿。又執事者。奉束帛篚。立於宗正之後。後牽乘馬。入陳於庭北首。西上。賓贊俱迴北面。西上再拜。宗正卿以幣篚。進西南向授賓。執事者以幣進授贊。冠者。宗正卿與執事者。退復位。賓贊降。從者互受幣。賓當庭。實揖左右馬以出。三馬從出。從者互受馬。宗正卿出門東西面。賓出門西東面北上。宗正卿與賓俱揖而退。賓贊就車輅。詣順天門外復命。朝謁。朝前衛尉。先於順天門外東。朝堂之北。設太子次。又於後設三師三少及詹事等次。皇太子冠訖。諸衛率依常行鹵簿。陳列威儀仗衛。前後部鼓吹備列。師傳以下。及官臣皆服其服。皇太子服遠遊冠。絳紗袍。乘輿以出。儀衛侍從如

常禮。洗馬前導。皇太子出重明門。左庶子跪奏。請降輿升輅。又左庶子稱
令曰諾。左庶子俛伏興。皇太子降輿。升金輅。三師乘輅車訓導在前。三少
亦乘輅車訓從在後。威儀仗衛依鹵簿。發引鳴鑼而行。至長樂門。鑼吹止。
至順天門。次迴輅西向。左庶子跪奏。請降輅就次。又左庶子稱令曰諾。左
庶子俛伏興。皇太子降輅。洗馬前導入次。左庶子侍。右舍人引三師三少
詹事就次。皇太子停於次少頃。舍人奏聞。典儀先於皇帝所御殿前設皇
太子位。左庶子跪奏請入。又左庶子稱令曰諾。左庶子俛伏興。皇太子出
次。左庶子等扶持。舍人引洗馬導引當門。揖引入。外官不入。諸儀衛鹵簿
等悉陳列於門外。皇太子入自東上閣。洗馬左庶子等從入。至皇帝所御
殿前位北向立。從官陪後。左庶子贊拜。皇太子再拜。侍中宣勅戒曰。事親
以孝。接下以仁。使人以義。養人以惠。訖。皇太子再拜。少進稱。臣雖不敏。敢
不祇奉。又再拜訖。引下詣皇后所御殿。至殿院內。給事奏聞出。則皇太子
入。洗馬左庶子等不入。太子至皇后所御殿前北向立。再拜。尚儀前承令
降。詣皇太子西北東面稱令旨。皇太子再拜。宣令戒之詞如皇帝。皇太子
再拜。少進稱。臣夙夜祇奉。不敢失墜。又再拜。司言引至閣。舍人承引以出。
皇太子還如來儀。皇太子謁太廟。前一日皇太子宿齋於正殿。其官

臣從入廟者宿於家正寢。所司拂除廟之內外。衛尉設皇太子次於寢西南角東向。又設三師以下。及官官次於皇太子之後。少近西俱東向。又設官官次於東宮朝堂。奉禮郎設皇太子版位於廟庭道東北向。典儀設官臣位於重明門外。文官在東西面。武官在西東面。每等異位。重行俱以北為上。其日未明。所司依鹵簿陳設於重明門外。官臣應從依依時刻集朝堂。皆服朝服。非朝服者服。諸衛率各勒所部陳設如式。左庶子版奏。請中嚴。僕策輅於西閣外南向。車右執刀立於輅前北向。舍人引官官各就位。侍衛之官各服其器服。其庶子負寶如式。俱詣閣奉迎。左庶子版奏外。辨僕奮衣而升。正立執轡。皇太子服遠遊冠。絳紗袍以出。左右侍衛如常。洗馬引皇太子升。僕立授綏。命車右升訖。車驅。左庶子以下夾侍如式。出重明門。左庶子進當輅前跪奏。稱左庶子臣某言。請車輅權停。請侍臣上馬。俛伏興。退稱侍臣上馬。贊者唱侍臣上馬。文武侍臣皆上馬。官官上馬畢。左庶子進當輅前跪奏。稱左庶子臣某言。請發引。俛伏興。退復位。皇太子車輅動。鏡吹不作。文官在左。武官在右。至下馬所。侍臣並下車馬。皇太子至次所。迴輅南向。左庶子跪奏。稱左庶子臣某言。請殿下降輅。俛伏興。還侍位。皇太子降輅。洗馬引入次。侍臣侍立如常。皇太子入次一刻頃。左庶

子跪奏。稱左庶子臣某言。請殿下出次。俛伏興。皇太子出次。謁者引家令。家令引皇太子入自南門。三卿三少導從如式。庶子二人。一人贊左。一人贊右。舍人二人從近。伏量人從入。皇太子至位。立定。家令奏請殿下再拜。皇太子再拜。少頃。家令奏事畢。謁者引家令。家令引皇太子出自南門。升輅還宮。如來儀。至重明門外。皇太子乘輅入。將士停。三師三少還。皇太子至殿前。迴輅。左庶子跪奏。請殿下降輅。俛伏興。皇太子降入。侍臣從至閣。左庶子跪奏。請將士各還本位。其還宮。鳴鏡吹如常。會群臣。皇太子冠。見廟之明日。皇帝會群臣如元會之儀。其上壽詞云。皇太子爰以吉辰。載加元服。德成禮備。普天同慶。臣等不勝悅慶。謹上千萬歲壽。群臣上禮。先上禮三日。本司宣令。諸應上禮文武之官。一品以下。五品以上。前一日。衛尉量設。次於東朝堂。漏上水七刻。各集於次。皆朝服。奉禮郎先設上禮之官。位於東朝堂南。文東武西。北面重行相對為首。又設中書舍人位。於文官為首者之北。南向。設奉禮郎位。於文官東北。贊者二人在其南。差退俱西向。牛酒在文武二位之間。少前。舍人各引應上禮之官就位。定令史二人對舉。賀錄按禮部郎中引就中書舍人前。取賀錄授舍人訖。引按退。奉禮郎唱再拜。贊者承傳。在位者皆再拜。中書舍人奉賀錄入進。舍人引在位者退。

酒十二斛。犢十二頭。赤繩為籠頭。奏訖。並付所司。皇太子會官臣。皇太子會官臣如常會之儀。上壽與上同詞。官臣上禮。先上禮一日。詹事宣告。上禮之官。詹事以下。七品以上。晝漏上水七刻。皆朝服集東宮南門之左。典儀先設群官位於中門外北面。以西為上。牛酒置其位西五步少近。晝漏上水八刻。通事舍人引群官皆就位定。詹事承奉群官簡錄按於詹事前。東面跪授導客舍人。導客舍人西面立受。迴南向立。典儀唱作可拜。詹事以下。俛伏興。皆再拜。導客舍人以簡錄按入。通事舍人引群官以下。左庶子省進酒九斛。盛以銅鐘一斛。犢九頭。赤繩為籠頭。皆付所司。政和五禮新儀。宋徽宗大觀二年八月十七日。詔議禮局。修到冠禮儀注。添入皇太子冠禮。別具詳定以聞。十一月十七日。詔議禮局。禮當追述三代之意。適今之宜。開元禮不足為法。今親製冠禮。沿革十一卷。其餘五禮可並依此編次。政和四年二月二日。禮制局詳定皇長子冠禮。宋皇太子冠儀。奏告前期大史局擇日。差官奏告。昊天上帝皇地祇。太廟別廟。太社。太稷。景靈東宮。景靈西宮。中太一宮。祐神觀。醴泉觀。上清儲祥宮。太清儲慶宮。九成宮。永安陵。永昌陵。永熙陵。永定陵。永昭陵。永厚陵。永裕陵。永泰陵。並如常告之儀。陳設前

期殿中監帥其屬尚舍。張設垂拱文德殿門之內。設御座於文德殿當中南向。東西房於御座之左右稍北。東西閣於殿後之左右。殿上前楹施簾。設香案於殿下。螭陛間。又為房於東。朶殿。大晟展宮架之樂。於殿庭橫街之南。協律郎舉麾位。於宮架西北東向。大司樂押樂位。於宮架之前北向。儀鸞司。設文武朔參官。及掌冠贊冠。掌冠。以禮部尚書。贊官。以鴻臚卿。應行禮官。東宮官次。於朝堂之內外。其日尚輦。陳大輦於殿西階下東向。列御馬於殿門外東廂西向。尚書兵部帥其屬列黃麾細仗於殿庭。典儀設皇太子朝見位。於橫街南北向。又設掌冠贊冠者受制位。於皇太子位稍北東上。又設左輔承制位。於御座之東。又設左輔宣制位。於皇太子位之東北。並西向。又設掌冠贊冠者及應行禮官位。於東階下。東宮官又位于後。並西向北上。太常設皇太子冠席。於東階上稍北西向。設褥位。陳服于席南東。領北上。衮冕垂白珠。九旒紅絲組為纓。青纊充耳。犀簪導。青衣朱裳。九章。五章在衣。山龍華蟲。火宗彝。四章在裳。藻粉米黼黻。白紗中單。青標襖裾。革帶塗金。銀鈎。髀蔽膝。隨裳色。火山二章。瑜玉雙佩。四采織成。大綬間施二玉環。白鞮朱履。桓圭遠遊冠。十八梁。金塗銀花飾。博山附蟬。紅絲組為纓。犀簪導。朱明服。紅裳白紗中單。方心曲領。絳紗蔽膝。餘同衮冕。

白鞵黑馬折上中公服。遠遊冠。簪導。袞冕。簪導同箱。在服南。設罍洗於阼階東。罍在洗東。篚在洗西。實巾一加勺。冕。光祿設醴席於西階上。南面。光祿實側尊在席南。饌設于席加冕。執事者並公服立於罍洗酒饌之所。九旒冕。遠遊冠。折上中各一匱。奉禮郎三人。執以待于東階之東。西面北上。設典儀位於宮架東北。贊者二人在南。少退。俱西向。皇帝御文德殿行禮。其日質明。闕文德殿門。文武朔參官及掌冠贊冠應行禮官。東宮官。入就次。服朝服。大樂正。帥樂工先入就位。協律郎入就舉麾位。大司樂入就押樂位。典儀帥贊者先入就位。又引掌冠贊冠者入立於文德殿門外。道東西向。東宮官以下。自東宮導從皇太子至殿門外。禮直官。通事舍人。太常博士。引皇太子詣文德殿東房訖。皇帝將出宮。東上閤門人引知樞密院事以下。詣垂拱殿立班。如常儀。東上閤門附內侍進班。齊牌垂拱殿簾降。皇帝乘輦出至殿上。少駐。輦官迎駕。自贊常起居。宣輦官上殿。簾卷。鳴鞭。行門禁衛諸班。親從迎駕。自輦常起居次。舍人先贊知內侍省官以下。常起居次。樞密以下。通班常起居。贊。祇候引駕樞密。知客省事以下。至簽書東上閤門官。分左右立。六尚應奉官。祇應武功大夫以下。並先退。管軍臣僚。窄衣執杖子。宣名常起居。贊。祇候引駕。並分左右。前導贊降東。

階垂拱殿門外。禁衛諸班親從。自贊常起居。託至門文德殿後。管軍臣僚
 易公服執杖子。殿階下分東西侍立。皇帝降輦。入西閣。前導官易朝服。詣
 御座前。分左右侍立。知樞密院。簽書樞密院。知客省事以下。至簽書東上
 閣門官。在東。同知樞密院。在西。閣門舍人以下。各詣兩朵殿上。不當祇應
 舍人。並殿下西向。諸軍將校先入。分立殿門內左右。內外符寶郎。具詣閣
 奉迎。御史臺。引殿中侍御史一員。先入就位次。東上閣門。御史臺。太常寺
 分引三公以下。文武百僚。入詣文德殿立班。東西相向。如月朔視朝之儀。
 禮直官。通事舍人。引左輔版奏中嚴。內外符寶郎。奉寶先出。少頃。又引左
 輔版奏外辨。皇帝服通天冠。絳紗袍。簾卷。大樂正令撞黃鐘之鐘。右五鐘
 皆應。殿上鳴鞭。禁衛諸班親從。自贊常起居。皇帝出西閣乘輦。協律郎俛
 伏跪。舉麾興。凡樂皆協律郎舉麾。工鼓祝而後作。愜麾戛敵而後止。工鼓
 祝。奏乾安之樂。禮直官。太常博士。引禮儀使導皇帝出自西房。內侍承旨。
 索戶扇合。皇帝降輦。即御座。簾卷內侍。又贊扇開。殿下鳴鞭。戛敵樂止。爐
 煙升。禮直官。太常博士。禮儀使。立於御座前。稍東西向。符寶郎。奉八寶。陳
 於御座之左右。分立如儀。禮直官。通事舍人。太常博士。引掌冠贊冠者。入
 就位。掌冠者初入門。肅安之樂作。至位樂止。立定。典儀曰。再拜。贊者承傳。

在位官皆再拜。左輔詣御座前承制。降東階。詣掌冠者前。稍東西向。稱有制。典儀曰。再拜。贊者承傳。在位官皆再拜。訖。左輔宣制曰。皇太子冠。命卿等行禮。宣制訖。掌冠贊冠者再拜。左輔復位。文臣侍從官。宗室武臣節度使以上升殿。分東西侍立。禮直官。通事舍人。太常博士。引掌冠贊冠者。及應行禮官。詣東階下位立定。東宮官。入詣皇太子東房次。禮直官。通事舍人。太常博士。詣皇太子東房。引皇太子。內侍二人夾侍。東宮官後從。自後准此。皇太子初行。欽安之樂作。即席西向坐。樂止。禮直官。通事舍人。太常博士。引掌冠贊冠者以次詣盥洗。樂作。搢笏。盥手。悅手。訖。執笏升。樂止。執折上中者升。掌冠者降一等受之。右執頂。左執前。進皇太子席前北向立。祝曰。咨爾元子。肇冠於阼。筮日擇賓。德成禮具。於萬斯年。承天之祐。乃跪冠。順安之樂作。掌冠者興。席南北面立。贊冠者進。席前北面跪。贊冠者進。席前北面跪。正冠興。立於掌冠者之後。皇太子興。內侍跪進服。服訖。樂止。掌冠者揖。皇太子復坐。禮直官。通事舍人。太常博士。引掌冠贊冠者降。詣盥洗。樂作。搢笏。盥手。悅手。訖。執笏升。樂止。贊冠者進。席前北向跪。脫折上中。置于匱興。內侍跪受服興。置于席。執遠遊冠者升。掌冠者降三等受之。右執頂。左執前。進皇太子席前北向立。祝曰。爰即令辰。申加元服。崇學以

齒。三善皆得。副予一人。受天百祿。乃跪冠。懿安之樂作。掌冠者興。席南北
 面立。贊冠者進席前北面跪。簪結紘興。立於掌冠者之後。皇太子興。侍內
 跪進服。服訖樂止。掌冠者揖。皇太子復坐。禮直官通事舍人太常博士引
 掌冠贊冠者降詣壘洗樂作。搢笏盥手。悅手訖。執笏升樂止。贊冠者進席
 前北向跪。脫遠遊冠。置于匱興。內侍跪受服興。置于席。執袞冕者升。掌冠
 者降三等受之。右執頂。左執前。進皇太子席前北向立。祝曰。三加彌尊。國
 本以正。無疆惟休。有室大競。懋昭厥德。保茲永命。乃跪冠。成安之樂作。掌
 冠者興。席南北面立。贊冠者進席前北面跪。簪結紘興。立於掌冠者之後。
 皇太子興。內侍跪進服。服訖樂止。禮直官通事舍人太常博士引皇太子
 降自東階。樂作。由西階升。即醴席南向坐。樂止。禮直官通事舍人太常博
 士引掌冠者詣壘洗樂作。搢笏盥手。悅手訖。執笏升西階。樂止。贊冠者跪
 取爵。內侍以酒注于爵。掌冠者受爵跪。進皇太子席前北面立。祝曰。旨酒
 嘉薦。有飶其香。拜受祭之。以定爾祥。令德壽豈。曰進無疆。皇太子搢圭。跪
 受爵。正安之樂作。飲訖奠爵。執圭。太官令奉饌。設於皇太子席前。皇太子
 搢圭食訖。樂止。執圭興。太官令徹饌及爵。禮直官通事舍人太常博士引
 皇太子降自西階。詣朶殿東房。易朝服。皇太子初行樂作。至次樂止。禮直

官。通事舍人。太常博士。引皇太子降立於橫街南北向位。東宮官復東階下西向位。皇太子初行樂作。至位立定樂止。禮直官。通事舍人。太常博士。引掌冠贊冠者。詣皇太子位前稍東西向。掌冠者少進。字之曰。始生而名。為實之賓。既冠而字。以益厥文。永受保之。承天之慶。奉勅字某。太常博士。請再拜。皇太子再拜訖。搢笏舞蹈再拜。奏聖躬萬福。又再拜訖。掌冠贊冠者。復東階下位。左輔詣御座前承旨。降自東階。詣皇太子前稍東西向。宣曰。有勅。太常博士請再拜。皇太子再拜。左輔宣勅戒曰。事親以孝。接下以仁。遠佞近義。祿賢使能。古訓是式。大猷是經。宣訖。左輔退復位。太常博士請再拜。皇太子再拜訖。禮直官。通事舍人。太常博士。引皇太子進前。俛伏跪。奏稱。臣雖不敏。敢不祇奉。奏訖。俛伏興。復位立。太常博士請再拜。皇太子再拜訖。禮直官。通事舍人。太常博士。前引皇太子出殿門。皇太子初行樂作。出門樂止。文武侍從官以上。武臣節度使以上。及侍立官。並降復位立定。典儀曰。再拜。贊者承傳。在位官皆再拜訖。禮直官。太常博士。引禮儀使詣御座前。俛伏跪。奏。禮儀使具官臣某言。禮畢。俛伏興。復位。內侍承旨。索扇。扇合。簾降。鳴鞭。大樂正令撞蕤賓之鐘。左五鐘皆應。乾安之樂作。皇帝降座。入自東房。內侍又贊扇開樂止。禮直官。通事舍人。引左輔版奏解。

嚴所司承旨放仗。應在位官皆再拜。訖。以次出朝見皇后。皇太子朝見皇
 帝。訖。入內朝見皇后。如宮中之儀。謁太廟。前期太常寺下太史局。擇日
 謁廟。前一日宮闈令帥其屬。清掃廟之内外。有司於廟東神門外道北面
 向。設皇太子幄次。又於殿庭東階下。近東西向。及遜室户内。各設皇太子
 褥位。又於幄次之南。道東西。并南櫺星門内外。設東宮官。及應從官等次。
 各量地之宜。皇太子宿齋於本宮。東宮官。及應從官各宿於本司。內執事
 官宿於本廟。其日質明。東宮應從官各服其服。所司陳鹵簿於東宮門外。
 禮直官引左庶子請內嚴。右庶子負寶如式。俱詣閣奉迎。僕進金輅於閣
 外。南向。左。內率執刀立於輅前。北向。中允一負。在侍官之前。贊者二人。又
 在中允之前。禮直官引左庶子言。外備僕攝衣而升。正立執轡。皇太子服
 遠遊冠。朱明衣。升輿以出。左右侍衛如常儀。左庶子進詣前。俛伏跪。稱左
 庶子姓某言。請皇太子降輿升輅。言訖。俛伏興。凡左庶子有請。並准此。皇
 太子降輿升輅。僕立授綏。左庶子以下。夾侍。贊善進當輅前。俛伏跪。稱贊
 善姓某言。請進輅。訖。俛伏興。凡贊善有請。並准此。輅動。贊善與贊者夾引
 以出。至侍官上馬所。贊善請輅權駐。令侍官上馬。左庶子前承令。退稱曰
 令諾。贊善退。稱侍官上馬。贊者承傳。文武侍官皆上馬。左庶子以下。夾侍

於輅前。侍官上馬畢。贊善請進輅。輅動。東宮官以下皆乘馬。以從至太廟。西。櫺星門外。迴輅南向。禮直官引左庶子進當輅前。請降輅。皇太子降輅。入幄次。一刻頃。禮直官引左庶子言。外備皇太子服衮冕出次。中允進圭。皇太子執圭。東宮官導從如儀。入詣殿庭東階之東西向位。立定。東宮官分立於左右。禮直官引率更令請再拜。皇太子再拜訖。禮直官引率更令前導。皇太子升自西階。詣僖祖室神位前北向立。率更令請再拜。皇太子再拜訖。次詣翼祖。宣祖。太祖。太宗。真宗。仁宗。英宗。神宗。哲宗。行禮如上儀。訖。降西階。復西向位立。禮直官引率更令詣皇太子前跪。稱率更令姓某言。禮畢。言訖。俛伏興。前導皇太子出東神門外。中允少前受圭。前引皇太子歸幄次。更朝服。有司轉仗衛於還途。如來儀。僕進金輅於西櫺星門外南向。禮直官引左庶子言。外備皇太子出次。至西櫺星門外升輅。侍官上馬如來儀。輅動至東宮門外。俱下馬。入至閣前。迴輅南向。左庶子請降輅。皇太子降輅。升輿。入侍官從至閣。左庶子請將士各還本所。謁別廟。並如太廟之儀。皇帝受群臣賀。其日質明。文武百僚並常服。早入就次。皇帝將出宮。讀奏目官以下。詣垂拱殿。官在殿庭之南。宣贊引班對立。舍人在其南。簿書官在舍人之西。少絕。覺察失儀。提點

使臣在其南。並北向。舍人以西為上。簿書官以下以東為上。宣贊舍人立班前西向。東上閣門。附內侍進班齊牌。皇帝出宮。守踏道行門禁衛諸班親從迎駕。自贊常起居訖。又自贊賀再拜訖。皇帝服鞞袍坐。鳴鞭。讀奏目官以下起居訖。讀奏目官。升降自東階。班首出班致詞稱賀。歸位再拜。如宣答。又再拜。次知內侍省事以下。次管軍臣僚各逐班先面西立。俟班到橫行北向贊起居稱賀。並如上儀。次行門起居稱賀再拜訖。俟舍人南階下直身奏班絕。皇帝降座。鳴鞭。詣紫宸殿後幄。排立諸班親從迎賀。自贊常起居。初垂拱殿起居稱賀。班將畢。樞密以下大班入就位。並如賀祥瑞立班之儀。東上閣門。附內侍進班齊牌。皇帝御紫宸殿坐。鳴鞭。舍人揖樞密以下。躬赴當殿。通某官姓名以下起居稱賀。復位。贊樞密以下再拜。搢笏舞蹈。又再拜。班首奏聖躬萬福。又再拜訖。班首出班致詞稱賀。復位再拜。搢笏舞蹈。又再拜。知東上閣門。當殿北向承旨訖。西向稱有制。樞密以下再拜。宣答訖。再拜。搢笏舞蹈。又再拜訖。鳴鞭。樞密直學士。自西階升殿侍立。知東上閣門官以下。殿庭東西向侍立。餘官分班出。宣贊舍人退。近南。當庭中立對立。舍人西出。文武百僚及諸軍將校殿門外序班立定。知東上閣門官以下。退立東階下。次殿中侍御史一員先入就位。次兩省。次

皇朝通志卷之三十三

禮

上將軍以下分班人。舍人分引文武班入。詣殿庭東西相向立。將校排不盡者。止殿門外立班。舍人揖班首以下躬。宣贊舍人當殿。通文武百僚宰臣。三公通某官。姓名以下。起居稱賀。舍人揖班首以下。橫行北向。兩省上將軍以下。依舊立。並如賀祥瑞立班之儀。宣贊舍人揖。左班近前。舍人自班後詣東階下立。知東上閣門官至通唱位。舍人揖班首以下躬。知東上閣門官贊拜。班首出班致詞稱賀。復位。樞密詣御座前承旨。退詣折檻東西向。宣答。班首以下再拜。並如上儀訖。知東上閣門官揖宰相。執政官升殿。並升自東階。內中書侍郎升自西階。樞密直學士下殿出。贊拜。知東閣門官還立位。引右班舍人由右班前出。餘官分出。知引進司東上閣門官還侍立位。宣贊舍人復位。次引進奉入如別儀。群臣上禮。其日引進司。先以所進馬。陳列於殿門外北向東上。俟群臣稱賀禮畢。宣贊對立。舍人稍南相向立。天武自西牽馬陳於殿庭。三分庭。一在南北首東上。外定贊。天武常起居訖。牽馬者不拜。門下侍郎於折檻東西向立。對立舍人當殿躬奏。某官姓名以下。進奉訖。復對立位。門下侍郎曰。進奉出還侍立位。天武應諾。負僚引進奉從東側門出。宣贊對立。舍人復位。合班躬奏。閣門無事。卷班西出。皇帝降座。鳴鞭。還幄次。知引進司官以下。並卷班出。三省

樞密院官並退。舍人引應進奉官殿門外。謝如常儀。皇帝會群臣。前期殿中監帥其屬。尚舍張設紫宸殿門之內。設御座於殿上。當中南向。尚醞設御酒尊酒器於御座之東。尚食設御茶林於御座之西。俱稍北。有司設群官酒尊酒器於殿下。又設群官座。並如宴百官座次之儀。其日群臣上禮畢。俟諸司排當備御史臺。先引進殿中侍御史一員。入就位。東上閣門。御史臺分引三公以下。文武以次入詣殿庭東西相向立。東上閣門附內侍進班齊牌。皇帝出幄次。鳴鞭。先行門禁衛諸班親從迎駕。奏聖躬萬福訖。皇帝即御座。鳴鞭。殿中監以下同知入內。內侍省事。知客省事以下。知內侍省事以下。帶御器械官六。尚局應奉官。祇應武功大夫以下。祇應諸司文臣鬪班。各奏聖躬萬福。次管軍臣僚。奏聖躬萬福。各復侍立。祇應位。次舍人引班首以下。橫行北向。並如宴百官立班之儀。班首奏聖躬萬福訖。舍人贊。各就座再拜。舍人分引升殿。席前相向立。朶殿兩廊官立於席後。教坊使以下。通班大起居。看醜人謝升殿再拜訖。內侍進御茶林殿侍酌酒訖。知東上閣門官。詣御座前。躬奏班首姓名以下。進酒舍人分引殿上臣僚。橫行北向。贊再拜。舍人引班首稍前。知東上閣門官。接引詣御座。東北向。搢笏。殿中監奉盤醜授班首。殿中少監啓醜。班首西向立。殿中

少監以酒注於醖。班首奉酒詣御座前躬進訖。少退。虛跪興。以盤授殿中監出笏。知東上閣門官引退。舍人接引復位。贊再拜。舍人引班首少前。殿上臣僚席前相向立。知東上閣門官接引班首詣御座東北向。搢笏。殿中監授盤捧詣御座前西向立。樂作。皇帝飲訖。舍人分引殿上臣僚橫行北向。知東上閣門引班首接醖訖。少退。虛跪興。授殿中監出笏引退。舍人接引復位。贊再拜。舍人贊各賜酒。群官俱再拜。贊就座。群官俱立席後復贊就座。群官俱坐。酒初行。群官搢笏受酒。先宰臣。次百官。皆作樂向食。典奉御前御食。太官設群官食。後准此。皇帝再拜舉酒。自此並殿中監。少監進酒。群官俱立席後。樂作飲訖。舍人贊就座。復行群官酒。皇帝三舉酒。次行群官酒。並如第之二儀。若宣示醖。即隨所向。東上閣門官以下。揖稱宣示醖。躬贊就座。若宣勸立席後。躬飲訖。贊再拜。內侍舉御茶牀。舍人引班首以下俱降階橫行。北向再拜。搢笏舞蹈。又再拜。分班出次。教坊使以下。謝祇應再拜訖。如賜祇應臣僚茶酒。並舍逐班贊再拜。知東上閣門官側奏無事。皇帝降座。鳴鞭。王應麟。王海祥符八年十二月戊寅。承天節。群臣上壽。是日皇子。慶國公加冠禮。輔臣面賀。宗室賀於內東門。司天言。日輝珥。直抱氣。戊子集賢校理晏殊。上皇子冠禮賦。詔獎之。辛卯進封壽春郡王。

制曰。辯惠之性。言必有章。趨進之容。動皆合禮。維城之制。載協周邦。半楚之封。尚遵漢牘。理宗寶祐二年九月癸亥。詔皇子以日南至行冠禮。十月癸酉。進封忠王。丁亥。詔臣清叟為賓師。彌主禮。十一月壬寅。行冠禮。玉壺清話。真宗中年。多或不豫。欲權彌聽斷。養和於西林園。即太清樓也。議委政於皇太子。加冠監國。用王沂公曾以輔之。時中丞王臻不喻上意。議方下。遽以疏上。臣聞欲行皇子冠。左傳異議曰。以歲星為年紀。十二而一周。於天道備。故所以人君十二始冠。冠弁也。行之於廟。漢已還間。或有即位而冠者。皆出於不得已也。改其名為加元服。皆漢儒因事旋講。寔非古也。冠義云。冠者禮之始也。王教之本。今皇子未歲。俾冠而臨國。冠道未成。不冠而監。豈可以童子之道理焉。唐景雲二年。睿宗欲以皇太子監國。召三品以上官廷議。群臣莫敢對者。臣切謂茲事體重。陛下春秋未高。伏望陛下念萬國。調順氣劑。存真納和。不必過計社稷。萬靈扶擁。聖履云云。時以政出官闈。無敢決議者。遂寢鐵圍山叢淡冠禮肇於古。國初草昧未能行。因循至政和講之焉。是時淵聖皇帝猶未入儲宮也。初以長子而行冠。於是天子御文德殿。百僚在位。命官行三加禮畢。當建命字儀典盛。是日方樂作行事。而日為之重輪也。先是諸王冠。止於宮中行世俗之禮。謂之

人進之...

...

上頭而已。繇是而後。天子諸子咸冠於外庭。蓋自淵聖始。宋史牟子才傳。皇子冠。面諭子才作樂章。禮部言古者適子一醮無樂。庶子三醮有樂。用樂非是。子才言嫡庶之分。時以所立之地不同。非適專用醴。庶專用醮也。樂章乃學士院故事。况面諭臣不敢不作。詔從之。

大明集禮國朝之制。參用周文王成王冠禮之年。近則十二。遠則十五。天子自為主。設

御座於殿庭。設冠席於殿之東壁。擇三公太常為賓。贊三加冠。一祝醴。祝辭。醮。字。辭。悉放周制。前期太史監承制。筮日工部製袞冕。遠遊冠。折上中服。翰林院撰祝文。祝辭。禮部備儀注。中書省承制。命某官為賓。某官為贊。既筮日。遣官奏告天地宗廟。禮部告示文武百官。於

皇城守宿。至日侵晨。具朝服行禮。前一日內使監令陳

御座。香案于奉天殿中。侍儀設皇太子次于奉天殿之東房。設賓

贊次于午門外。設

皇太子拜位。于丹墀。陞上正中。又設賓受制位。於

皇太子位之稍西北。東向。設承制官位。於

御座之東西向。又設承制官宣制位。於

皇太子位之東北西向。設賓贊拜位。於內道之東北面西上。設文官拜位。於丹墀內道之東。每等異位。重行北面西上。試武官拜位。於丹墀內道之西。每等異位。重行北面東上。設使客位。於文官拜位之東北面西上。設殿前班諸執事起居位。於武官起居位之北東向。設侍從班諸執事起居位。於文官起居位之北西向。設宿衛鎮撫二人位。於東西陛下東西相向。護衛百戶二十四人位。於宿衛鎮撫之南。稍後東西相向。典牧所官二人位。於乘馬之前。東西相向。知班二人位。於文武拜位之北。東西相向。通贊典禮二人位。於知班之北。東西相向。通贊在西。贊禮在東。引太師太尉二人位。於太師之北。西立東向。引文武班四人位。於文武官拜位之北。稍後東西相向。引殿前班二人位。於引武班之南。引使者二人位。於引文班之南。設殿前班指揮司官三員侍立位。於丹陛上之西東向。光祿寺官三員位。於丹陛上之東西向。護衛司官位。於殿門之左右東西相向。文官侍從。起居注。給事中。殿中侍御史。尚寶卿位。於殿上之東西向。武官侍從班。懸刀指揮位。於殿上之西東向。護衛千戶八人位。於殿東西門之左右東西相向。典儀二人位。於丹陛下之南。東西相向。鳴鞭四人位。列於丹陛上北向。將軍二人。於殿上簾前之左右。將軍六人位。於殿門之左右。將軍四人位。於丹

卷之三十三
 禮部
 禮儀典
 禮儀典
 禮儀典

陞上之四隅。將軍六人。於奉天門之左右。東西相向。是日侵晨。金吾衛陳設甲士於午門外之東西。擊鼓於門外之中道。列旗仗於奉天門外之東西。陳五輅於丹墀之南北向。典牧所。陳仗馬於文武樓之南。東西相向。陳虎豹於奉天門外。東西相向。協律郎陳樂於丹墀。文武官拜位之南。執事官設壘洗於丹陛西階之下。東向。壘在洗東。篚在洗西。內使監設皇太子冠席於殿上。東南西向。設醴席於西階上。南向。張帷幄於東序內。設褥席於帷中。又張帷於序外。御用監陳服於帷內。東領北上。袞服九章。遠游冠。絳紗袍。折上巾。絳紗袍。緇纁犀簪二物同箱。在服南。櫛實於箱。又在南。司尊實醴於側尊。加勺幕設於醴席之南。設坫於尊東。置二爵於坫。設洗於坫南。進饌者實饌設於尊北。諸執事者皆立於其所。冕九旒。遠游冠。十八梁。折上巾冠冕。各一箱。盛執事官。各執立於階之西。東面北上。擊鼓初嚴。催班舍人各催文武官具朝服。擊鼓次嚴。引班引文武官依品從齊班於午門外。以北為上。東西相向。通班贊禮。知班典儀。內贊宿衛鎮撫護衛鳴鞭。殿內外將軍俱入就位。引禮引賓贊入位。於奉天門外。道東西相向。東宮官以下導從。

皇太子至殿門外。贊禮同太常博士引。

皇太子詣 奉天殿東房訖。引班引殿前指揮。光祿卿。諸侍衛官。各服其器服。及尚寶卿。侍從官入詣 謹身殿奉迎。擊鼓三嚴。引班引文武官以序入。就起居位。侍儀版奏外辨。御用監奏請。

皇帝服通天官。絳紗袍。御輿以出。侍衛導從警蹕如常儀。

皇帝將出。仗動陞。

御座。將軍捲簾鳴鞭。司辰鷄唱訖。引禮引賓贊入就位立定。贊禮唱鞠躬。樂作。拜。興。拜。興。拜。興。平身。承傳唱在位官皆四拜。平身。樂止。侍儀詣御座前承 制。降自東階。詣賓前稍東西向。稱有勅。贊禮曰。跪。承傳贊曰。在

位官皆跪。侍儀宣 制曰。

皇太子冠命卿等行禮。宣制訖。贊禮唱拜。興。拜。興。拜。興。平身。文武侍從班。起居注。給事中。殿中侍御史。尚寶卿。陞殿。立於殿上之東西向。武官侍從班。懸刀指揮。陞殿。立於殿上之西東向。引禮。引賓贊。及應行禮官。詣東階下位立定。東宮官入詣。

皇太子東房次。太常博士亦詣東房。引。

皇太子入就冠席。內侍二人。夾侍東宮官後從。

皇太子初行。樂作。即席西南向。樂止。引禮。引賓贊以次。詣壘洗。樂作。搯笏。盥。

手。悅手訖。執笏。樂作。升自西階。執上中者升。賓降一等受之。右執頂。左執前。進。

皇太子席前。北面祝畢。乃跪冠。樂作。賓興。席南北面立。贊冠者進席前。北面跪。正冠。興。立於賓之後。內侍跪進服。服訖。樂止。賓揖。

皇太子復坐。引禮引賓贊降。詣壘洗。如上儀。贊冠者進席前。北向跪。脫折上中。置于廂。興。授內侍跪。置于席。執遠遊冠者升。賓降二等受之。右執頂。左執前。進。

皇太子席前。北向立。祝畢。乃跪冠。樂作。賓興。南北面立。贊冠者進席前。北面跪。簪結紘。興。立於賓後。

皇太子興。內侍跪進服。服訖。樂止。賓揖。皇太子復坐。引禮引賓贊降。詣壘洗。如上儀。贊冠進席前。北向跪。脫遠遊冠。置于箱。興。授內侍。內侍受。置于席。執衮冕者升。賓降三等受之。右執頂。左執前。進。

皇太子席前。北向立。祝畢。乃跪冠。樂作。賓興。席南北面立。贊冠者進席前。北面跪。簪結紘。興。立於賓後。

皇太子興。內侍跪進服。服訖。樂止。太常博士引。皇太子降自東階。樂作。由

西階升。即醴席南向坐。樂止。引禮引賓詣盥洗。樂作。搯笏盥手。悅手訖。執笏升西階。樂止。贊冠者取爵。盥爵。悅爵。詣司尊所。酌醴授賓。賓受爵。跪進于皇太子席前。北向祝畢。皇太子搯圭。跪受爵。樂作。飲訖。奠爵。執圭。進饌者奉饌。設於

皇太子席前。皇太子搯圭。食訖。執圭興。執事官徹爵興饌。太常博士引皇太子降自西階。詣殿門東房。易朝服訖。詣丹墀拜位。北向。東宮官屬各復拜位。

皇太子初行。樂作。至位。樂止。引禮引賓贊詣

皇太子位。稍東西向。賓少進。字之。辭畢。奉勅。字某。太常博士啓

皇太子再拜。典儀唱鞠躬。拜興。拜興。跪聽宣勅畢。就再拜。平身。太常博士引皇太子進

御座前。俛伏跪。奏稱。臣不敏。敢不祗奉。奏畢。復位。侍立。官並降殿。復拜位。典儀唱鞠躬。拜興。拜興。拜興。承傳唱在位。官以下皆拜。鞠躬。四拜。平身。侍儀奏禮畢。贊禮承唱禮畢。

皇帝興。樂作。警蹕。侍從導引如來儀。至 謹身殿。樂止。內給事導皇太子入內朝見

皇后如朝正之儀。引禮引賓贊引班。引東宮官及文武百官以次出。明日謁廟。其日陪祭官先赴廟庭東西位北向立。

皇太子服衮冕。執圭。太常博士導。皇太子由南門入。就廟庭前。褥位北向立。太常博士啓。

皇太子再拜。典儀唱鞠躬。拜。興。拜。興。平身。承傳唱陪位官皆拜。鞠躬。再拜。平身。太常博士奏。請。皇太子升殿。東階詣神位香案前。褥位北向立。太常啓。

皇太子上香。上香。三上香。訖。復位。又啓。

皇太子鞠躬。拜。興。拜。興。平身。贊禮承傳陪位官皆拜。鞠躬。再拜。平身。典儀啓。禮畢。承傳唱禮畢。儀仗導。皇太子還宮。如來儀。詳冠禮下。

永樂大典卷之一萬九千七百八十九

永樂大典卷之一萬九千七百九十 一屋

服

朝服

晦庵語類古者有祭服。有朝服。祭服所謂鷩冕之類。朝服所謂皮弁。玄端之類。天子諸侯各有等差。自漢以來。朝服則所謂進賢冠。

絳紗袍。祖宗以來。亦有冕服。車騎之類。而不常用。惟大典禮則用之。今朝廷服色三等。乃古問服。此起於隋煬帝。然當時亦自有朝服。今亦自有朝服。大祭祀時用之。然不常以朝。到臨祭時取用。今之朝服。乃戎服。蓋自隋煬帝數遊幸。令百官以戎服。從一品紫。五品朱。六品青。皂靴。乃上馬鞋也。

後世循襲遂為朝服。然自唐人朝服。猶著禮服。幞頭圓頂軟脚。今之吏人所冠者是也。桶頭帽子。乃隱士之冠。宣和末。京師士人行道間。猶著衫帽。至渡江戎馬中。乃變為白涼衫。紹興二十年間。猶是白涼衫。至後來軍興。又變為紫衫。皆戎服也。禮記喪大記。小臣復復者朝服。君以卷。夫人以屈狄。大夫以玄纁。世婦以禴衣。士以爵弁。士妻以稅衣。注。朝服而復。所以事君之衣也。用朝服而復之者。敬也。儀禮士冠禮。主人冠朝服。注。玄冠。委貌也。朝

服者十五升。布衣而素裳也。衣不言色者。衣與冠同也。三禮圖王制云。周人玄衣而養老。註云。天子燕服為諸侯朝服。彼云玄衣。此即玄端也。張鎰圖云。緇玄二服。素鞞素帶。朱絲終禪。佩山玄玉。白馬青絢。纒純。天子之卿服以從燕諸侯。諸侯之公卿大夫服以朝君。王應麟玉海玉藻。天子玄端。而朝日聽朔。注。端當作冕。諸侯玄端以祭。朝服以日視朝於內朝。注。朝服。玄端。素裳也。周書王會。成王之會。天子南面立。纒無繁露。繁露。纒之所垂也。朝服八十物。搢珽。唐叔荀叔。周公在左。太公望在右。皆纒亦無繁露。朝服六十物。搢笏。堂下之左。唐公。虞公。立馬。堂下之右。殷公。夏公。立馬。皆南面。纒有繁露。朝服五十物。皆搢笏相者。太史魚行人皆朝服。有繁露。堂下之東面。郭叔長。棊幣。纒有繁露。注。此服名因於殷。非周制也。儒學警悟或問。漢臣朝服。僕云。張敞議云。敞備皂衣二十餘年。注云。雖有五時服。至朝皆着皂衣。又谷永書云。擢之皂衣之吏。廁之諍臣之末。則知漢朝之服皆皂衣也。周禮衮冕九章。鷩冕七章。毳冕五章。希冕三章。玄冕衣無文。裳刺黻而已。故曰卿大夫之服。自玄冕而下。如孤之服。則皂衣者。乃周之卿大夫玄冕也。漢之皂衣。蓋本於此。晉書輿服志。漢制一歲五郊。天子與執事者。所服各如方色。百官不執事者。服常服絳衣。以從魏祕書監秦靜曰。漢

氏承秦。改六冕之制。但玄冠絳衣而已。魏已來。名為五時朝服。又有四時朝服。又有朝服。自皇太子已下。隨官受給。百官雖服五時朝服。據今止給四時朝服。闕秋服。三年一易。其於大小會。祠宗廟。朔望五日。還朝皆朝服。常還上宮則朱服。預上宮正會。則於殿下脫劔舄。又有三梁進賢冠。其侍祀則平冕九旒。袞衣九章。白紗絳緣中單。絳繒鞞采畫織成。袞帶金辟邪首。紫綠二色帶采畫。廣領曲領各一赤舄。絳袜若禱。則著介憤單衣。釋奠則遠遊冠。玄朝服。絳緣中單。絳袴袜。玄舄。若未加元服。則中舍人執冕從。介一中。元玄。黃門侍郎申胤上言曰。夫名尊禮重。先王之制。冠冕之式。代或不同。漢以蕭曹之功。有殊群辟。故劔履上殿。入朝不趨。世無其功。則禮宜闕也。至於東宮體此為儀。魏晉因循。制不納舄。今皇儲過謙。準同百僚。禮卑逼下。有違朝式。太子有統天之重。而與諸王齊冠遠游。非所以辨章貴賤也。祭享朝慶。宜正服袞衣九文。冠冕九旒。又仲冬長至。大陰數終。黃鐘產氣。綿微於下。此月閉闕旅。息后不省方。禮記曰。是月也。事欲靜。君子齊戒去聲色。唯周官有天子之南郊。從八能之說。或以有事至靈。非朝享之節。故有樂作之理。王者慎微。禮從其重。前來二至闕鼓。不宜有設。今之鏗鎗。蓋以常儀。二至之禮。事殊餘節。猥動金聲。驚越神氣。施之宣養。實為

未盡。又朝服雖是古禮。降搆始於秦漢。迄于今代。遂相仍準。朔望正旦。乃具衮舄。禮諸侯族見天子。不得終事者三。雨沾服失容。其在一焉。今或朝日。天雨未有定儀。禮貴適時。不在過恭。近以地濕。不得納舄。而以衮襪改履。案言稱朝服。所以服之而朝。一體之間。上下二制。或廢或存。實乖禮意。大燕受命。倅蹤虞夏。諸所施行。宜損益定之。以為皇代永制。慕容雋曰。其劔舄不趨。事下太常叅議。太子服衮冕九旒。超級逼上。未可行也。冠服何容一施一廢。皆可詳定。南史朝服一具。冠幘各一。絳緋袍。皂緣中單。衣領袖各一領。革帶袷袴各一。舄袜各一。量簪導餉自副。四時朝服者。加絳絹黃緋。青緋。皂緋袍。單衣各一領。五時朝服者。加給白絹袍。單衣一領。諸受朝服。單衣七丈二尺。科單衣及構五丈二尺。中衣絹五丈。緣皂一丈八尺。領袖練一匹一尺。絹七尺五寸。袷袴練一丈四尺。縑二丈。袜布三尺。單衣及構袷。帶縑各一段長七尺。江左止給絹。各有差。宋元嘉末。斷不復袷。至今山鹿狽柱狽白狽施毛。狐白領。黃豹斑白鼯子渠梭裘。步搖八鎮蔽結多服。蟬明中擢白。又諸織成衣帽錦帳。純金銀器。雲母從廣一寸。以上物者。皆為禁物。南齊書後魏孝明熙平元年九月。侍中儀同三司。崔光表奉詔。定五時朝服。案北京及遷都以來。未有斯制。輒勒禮官詳據。大學博

士崔瓚議云。周禮及禮記。三冠六冕。承用區分。璣玉五綵。配飾亦別。都無
 隨氣春夏之異。唯月令。有青旂。赤玉。黑衣。白輅。隨四時而變。復不列弁冕
 改用之。玄黃。以此而推。五時之冠。禮既無文。若求諸正典。難以經證。案司
 馬彪續漢書。輿服及祭祀志云。迎氣五郊。自永平中。以禮讖并月令。迎氣
 服色。因采元始故事。北五郊於洛陽。又云五郊。衣幘各如方色。又續後魏
 漢禮儀志。立春。京都百官皆著青衣。冊府元龜。後魏孝明帝。正光二年十
 二月。詔司徒崔光。安豐王延明等。議定章服。初。孝文太和中。稽考舊典。以
 制冠服百寮。亦有差次。制未周給。至是。又詔光等。及在朝名學。更條章粗
 備焉。文獻通考。陳永定元年。武帝即位。徐陵曰。乘輿御服。皆採梁制。帝曰。
 今天下初定。務從節儉。應用綉織成者。並可彩畫。至文帝天嘉初。悉改易
 之。其加官之服。開國公侯伯子男。並朝服。紗朱衣。若助祭郊廟。皆袞。玄
 上纁下。山龍以下九章。備五采。大佩赤舄。約履餘。文官朝服。武賁中郎將。
 羽林監。絳紗縠單衣。州刺史。絳朝服。直閣將軍。諸殿主帥。朱衣。正直絳衫。
 從則襴襦衫。太子衛率。率更令丞。早朝服。殿中將軍。負外將軍。州郡都尉。司
 馬。中通事舍人。太子通事等。並朱服。玄衣。赤幘。袴褶。太子二所服。武冠
 絳構。殿前威儀。武賁散給使。閤將。鼓吹士帥。副太子鹵簿。戟吏所服。隋書

百官朝服。公服。皆執手板。尚書錄令僕射。吏部尚書。手板頭。復有白筆。以紫皮裏之。名曰笏。朝服綴紫荷。錄令左僕射左荷。右僕射吏部尚書右荷。七品已上文官朝服。皆簪白筆。正王公侯伯子男卿尹。及武職並不簪。朝服冠幘各一。絳紗單衣。白紗中單。早領袖。早襪。革帶曲領。方心蔽膝。白筆。烏袜。兩綬。劔佩。簪導。鈎鑿。為具服。七品已上服也。禮儀志朝服。亦名具服。冠幘。簪導。白筆。絳紗單衣。白紗內單。早領袖。早襪。革帶。鈎假帶。曲領。方心。絳紗蔽膝。襪。烏綬。劔佩。從五品已上陪祭。朝享。拜表。凡大事則服之。六品已下。從七品已上。去劔佩綬。餘並同。自餘公事皆從公服。亦名從省服。開國公朝服。紗朱衣。進賢三梁冠。佩山玄玉。獸頭鞶。腰劔。開國侯伯朝服。紗朱衣。進賢三梁冠。佩水蒼玉。獸頭鞶。腰劔。開國子男朝服。紗朱衣。進賢三梁冠。佩水蒼玉。獸頭鞶。腰劔。縣鄉亭關內關中。及名號侯朝服。進賢二梁冠。獸頭鞶。腰劔。關內關中。及名號侯則珪劔。關外侯朝服。進賢二梁冠。獸頭鞶。腰劔。諸王嗣子朝服。進賢二梁冠。佩山玄玉。獸頭鞶。腰劔。開國公侯嗣子朝服。進賢二梁冠。佩水蒼玉。獸頭鞶。腰劔。太宰。太傅。太保。司徒。司空。朝服。進賢三梁冠。佩山玄玉。獸頭鞶。腰劔。陳令如有相國丞。押服制同。大司馬。大將軍。太尉。諸位從公者朝服。武冠。佩山玄玉。獸

頭鞞。腰劔。直將軍則不帶劔。尚書令僕射尚書朝服。納言。饋。進賢冠。佩水蒼玉。腰劔。紫荷。執笏。侍中散騎常侍。通直常侍。負外常侍。朝服。武冠。貂蟬。侍中左。挿常侍右。挿。皆腰劔。佩水蒼玉。其佩。負外常侍不給。舊至尊朝會。登殿。侍中常侍夾御下輿。則扶左右。侍中驂乘。則不帶劔。中書監令。秘書監朝服。進賢兩梁冠。佩水蒼玉。腰劔。獸頭鞞。陳制。銀章。龜鈕。青綬。八十首。獸頭鞞。腰劔。餘同梁。陳令。光祿大夫。有特進。進賢二梁冠。朝服。佩水蒼玉。青劔。梁令不載。光祿太中。中散大夫。太常。光祿。弘訓。太僕。太僕廷尉。宗正。大鴻臚。大司農。少府。大匠。諸卿。丹陽尹。太子保傅。大長秋。太子詹事。朝服。進賢冠。二梁。佩水蒼玉。卿大夫。助祭。則冠平冕。五旒。黑玉為珠。有前無後。各以其綬采為組纓。旁垂黹。纁衣。玄上。纁衣。畫華蟲七章。皆佩五采。大佩。赤舄。胸屨。陳官。卿改云。慈訓。餘皆同梁。又有大舟。卿。服章同。驃騎車騎衛將軍。中軍冠軍。輔國將軍。四方中郎將。朝服。武冠。佩水蒼玉。陳令。鎮衛。驃騎。車騎。中軍。中衛。中撫軍。中權。四征。四鎮。四安。四翊。四平。將軍。獸頭鞞。朝服。武冠。佩水蒼玉。自中軍已下。諸將軍。及冠軍。四方中郎將。並官不給佩。領護軍中。領護軍五營校尉。朝服。武冠。佩水蒼玉。獸頭鞞。其屯騎夾御。日假給佩。餘校不給。弘訓。衛尉。衛尉。陳官。卿云。慈訓。服

同諸卿。但武冠。司隸校尉。陳無官服。左右衛驍騎游擊前左右後軍將軍。龍驤。寧朔。建威。振威。奮威。揚威。廣威。武威。建武。振武。奮武。揚武。廣武。等將軍。積弩。積射。強弩。將軍。監軍朝服。武冠。佩水蒼玉。獸頭鞞。驍游已下。並不給佩。驍游夾侍。日假給。陳令。左右衛銀章龜鈕。不給劍。左右驍騎游擊雲騎游騎。前左右後軍將軍。左右中郎將。銀印珪鈕。餘服飾同梁。亦官不給佩。其驍游雲騎夾御。日假給。其積弩。積射。強弩。銅印環鈕。墨綬帶劍。餘服同梁。又有忠武軍師。武臣爪牙。龍騎。雲麾。鎮兵。翊帥。宣惠。宣毅。智威。仁威。勇威。信威。嚴威。智武。仁武。勇武。信武。嚴武。金章豹鈕紫綬。八十首。官不給輕車。鎮朔。武旅。貞毅。鈕紫綬。並獸頭鞞。朝服。佩水蒼玉。國子祭酒。阜朝服。進賢二梁冠。佩水蒼玉。御史中丞。都水使者。朝服。進賢二梁冠。獸頭鞞。腰劍。佩水蒼玉。陳。中丞二梁冠。餘同梁。其都水。陳梁改為太舟。卿服在諸卿中見。謁者僕射朝服。高山冠。獸頭鞞。佩水蒼玉。腰劍。諸軍司朝服。武冠。獸頭鞞。給事中。黃門侍郎。散騎通直。負外散騎侍郎。奉朝請。太子中庶子。庶子。武衛將軍。武騎常侍。朝服。武冠。腰劍。陳令。庶子已上。簪筆。其武衛不劍。正直夾御。白布袴褶。中書侍郎朝服。進賢一梁冠。腰劍。冗從僕射。太子衛率。獸頭鞞。朝服。武冠。武賁中郎將。羽林監朝服。武冠。獸

頭鞞。腰劔。其在陞牙。及備鹵簿。著毳尾。絳紗縠單衣。護匈奴中郎將。護
羌戎夷蠻越烏丸西域校尉朝服。武冠。獸頭鞞。陳令。無此官。其庶子鎮蠻。
寧蠻。平戎。西戎校尉。平越中郎將。服章同。安夷。撫夷。護軍州郡國都尉。

奉車駙馬騎都尉。諸護軍。獸頭鞞。朝服。武冠。陳。安遠。鎮蠻。護軍州郡國都
尉。奉車駙馬騎都尉。諸護軍。服章同。無餘文。州刺史。獸頭鞞。腰劔。絳朝

服。進賢二梁冠。陳。同。梁。郡國太守相內史。獸頭鞞。單衣介幘。加中二千

石。依卿尹冠。服劔佩。尚書左右丞。祕書丞。獸爪鞞。朝服。進賢一梁冠。

尚書祕書著作郎。太子中舍人。洗馬舍人。朝服。進賢一梁冠。腰劔。諸王

友文學。朱服。進賢一梁冠。陳。令。諸王師服同。治書。侍御史朝服。腰劔。法冠。

陳。有殿中。蘭臺。侍御史。朝服。法冠。腰劔。簪筆。諸博士。給阜朝

服。進賢兩梁冠。佩水蒼玉。太學博士。正限八人。著佩限六人。不給。廷

尉律。博士無佩。並簪筆。國子助教。阜朝服。進賢一梁冠。簪筆。公府長

史。獸頭鞞。諸卿尹丞。獸爪鞞。簪筆。諸縣署令秩千石者。獸爪鞞。朝服。進

賢一梁冠。長史。朱服。諸卿尹丞。建康令。玄服。公府掾。屬主簿。祭酒。朱服。進

賢一梁冠。公府令史亦同。領護軍長史。朱服。獸頭鞞。諸軍長史。單衣介

幘。獸頭鞞。諸卿部丞。獄丞。並阜朝服。一梁冠。黃綬。獸爪鞞。簪筆。太子

保傳。詹事丞。皂朝服。一梁冠。簪筆。獸爪鞞。黃綬。郡國相。內史丞。長史。單衣。介幘。長史。獸頭鞞。其丞。黃綬。獸爪鞞。諸縣署令。長相。單衣。介幘。獸頭鞞。朝服。進賢。一梁冠。諸署令。朱衣。武冠。州都大中正。郡中正。單衣。介幘。太子門大夫。獸頭鞞。陵令。長。獸爪鞞。朝服。進賢。一梁冠。令。長。朱服。率更家令。僕。朝服。兩梁冠。獸頭鞞。腰劔。黃門諸署令。僕。長丞。朱服。進賢。一梁冠。黃門冗從。僕。射監。太子寺人。監。朝服。武冠。獸頭鞞。公府司馬。領護軍司馬。諸軍司馬。護匈奴中郎將。護羌戎。夷蠻。越烏丸。戊巳校尉。長史。司馬。獸頭鞞。朝服。武冠。諸軍司馬。單衣。平巾幘。長史。介幘。陳令。公府司馬。領護軍司馬。諸軍司馬。鎮安蠻。安遠護軍。蠻戎。越校尉。中郎將。長史。司馬。其服章與梁官同。公府從事中郎。朱服。進賢。一梁冠。諸將軍。開府功曹主簿。單衣。介幘。革帶。廷尉。建康正監。平。早零辟。朝服。法冠。獸爪鞞。左右衛司馬。單衣帶。平巾幘。獸頭鞞。諸府參軍。單衣。平巾幘。諸州別駕。治中。從軍主簿。西曹從事。玄朝服。進賢。一梁冠。簪筆。常公事。單衣。介幘。朱衣。直閣將軍。朱服。武冠。青綬。獸頭鞞。直閣將軍。諸殿主帥。朱服。武冠。正直絳衫。從則兩襠衫。諸開國郎中令。大農公。傅中尉。朝服。進賢。兩梁冠。中尉。武冠。皆獸頭鞞。諸開國三將軍。朝服。武冠。陳服並同梁。左右常侍。侍郎。典衛。

中尉司馬朝服。武冠。典書典祠學官令朝服。進賢一梁冠。常侍侍郎。典書典祠學官令。簪筆。腰劍。太子衛率率更家令丞。早朝服。進賢一梁冠。獸爪鞞。太子常從武賁督朝服。武冠。獸爪鞞。殿中將軍負外將軍。朱服。武冠。州郡國都尉司馬。朱服。武冠。獸頭鞞。諸謁者朝服。高山冠。中書

通事舍人。門下令史。主書典書令史。門下朝廷局書令史。太子門下通事守舍人。主書典守舍人。二宮齋內職左右職局齋幹已上。朱服。武冠。殿中內外局監。太子內外監。殿中守舍人。朱服。武冠。內外監典事書吏。朱服。進賢一梁冠。內監朝廷人領局典事。外監統軍隊諮詳發遣局典事。武冠。外監及典事書吏。悉著朱衣。唯正直及齋監。并受使不在例。其東宮內外監。典事書吏。依臺格五校三將。將軍主事。內監主事。外監主事。三校主事。朱服。武冠。尚書都令史。都水參軍門下。書令史。集書中書。尚書秘書。著作掌書。主書主圖。主譜典客令史。監令僕射省事。蘭臺殿中。蘭臺謁都水令史。公府令史。書令史。太子導客次客守舍人。及諸省典事。朱衣。進賢一梁冠。尚書都竿。度支竿。左戶校吏。朱服。進賢一梁冠。諸縣署丞。太子諸署丞。王公侯諸署。及公主家令丞僕。朱服。進賢一梁冠。太官太醫丞。武冠。諸縣尉。單衣介幘。黃綬。獸爪鞞。節騎郎。朱服。武冠。其在陞列。及備鹵簿。

者。毳尾絳紗。殺单衣。御節郎。黃鉞郎。朝服。赤介憤。簪筆。典儀。唱警。唱奏事。持兵主麾等諸職公事。及備鹵簿。朱服武冠。殿中中郎將。校尉。都尉。青綬。朱服。武冠。獸頭鞞。城門候。銅印。環鈕。墨綬。朱服。武冠。獸頭鞞。部曲督。司馬。吏部。曲將。銅印。環鈕。朱服。武冠。司馬。吏。假墨綬。獸爪鞞。太中。中散。諫議大夫。議郎。中郎。郎中。舍人。朱服。進賢一梁冠。諸門郎。僕射。佐吏。東宮門吏。其郎。朱服。僕射。阜零辟。朝服。進賢冠。吏。却非冠。佐吏。著進賢冠。總章。協律。獸爪鞞。朱服。武冠。黃門。後閣。舍人。主書。齋帥。監食。主食。主客。扶侍。鼓吹。朱服。武冠。鼓吹。進賢冠。齋帥。墨綬。獸頭鞞。殿中。司馬。朱服。武冠。獸頭鞞。總章。監。鼓吹。監。朱服。武冠。諸四品。將兵。都尉。牙門。將。崇毅。材官。折難。輕騎。揚烈。威遠。寧遠。宣威。光威。驤威。威烈。威虜。平戎。綏遠。綏狄。綏邊。綏戎。獸威。威武。烈武。毅武。奮武。討寇。討虜。殄難。討難。討夷。厲武。橫野。陵江。鷹揚。執訊。蕩寇。蕩虜。蕩難。蕩逆。殄虜。掃虜。掃難。掃逆。掃寇。厲鋒。武奮。武牙。廣野。領兵。滿五十人。朱服。武冠。以此官為刺史。太守。皆青綬。此條已下。皆陳制。與梁不同。典儀。但帥。典儀。正帥。朱衣。武冠。其本資有殿。但正帥。得帶艾綬。獸頭鞞。殿。但帥。正帥。艾綬。獸頭鞞。朱服。武冠。殿。帥。羽儀。帥。負外。帥。朱衣。武冠。威雄。猛烈。振信。勝略。風力。光等。十威。將軍。武猛。略勝。力毅。

健烈威銳勇等十武將軍。並獸頭鞞。武冠朝服。猛毅烈威銳震進智威
 勝駿等十猛將軍。獸頭鞞。武冠朝服。壯武勇烈猛銳威毅志意力等十
 壯將軍。驍雄桀猛烈武勇銳名勝迅等十饒將軍。雄猛威明烈信武勇毅
 壯健等十雄將軍。並獸頭鞞。武冠朝服。忠勇烈猛銳壯毅捍信義勝等
 十忠將軍。明智略遠勇烈威勝進銳毅等十明將軍。光烈明英遠勝銳命
 勇武野等十光將軍。颯勇猛烈銳奇決起略勝出等十颯將軍。獸頭鞞。武
 冠朝服。龍驤武視雲旗風烈雷威雷音馳銳進銳羽騎突騎折衝冠武
 和戎安壘起猛英果掃虜掃狄武銳推鋒開遠略遠貞威決勝清野堅銳
 輕銳拔山雲勇振旅等三十號將軍。獸頭鞞。朝服武冠。超武鐵騎樓船
 宣猛樹功剋狄平虜稜威戎昭威戎伏波雄戟長劍衝冠雕騎飲飛勇騎
 破敵剋敵威虜前鋒武毅開邊招遠全威破陣蕩寇殄虜橫野馳射等三
 十號將軍。獸頭鞞。朝服武冠。并左十二件將軍。則止朱服武冠而已。其勲
 選除亦給章印。千人督。校督。司馬。武賁督。牙門將。騎督。督守將。兵都尉。太
 子常從督。別部司馬。假司馬。朱服武冠。獸頭鞞。武猛中郎將。校尉。都尉。
 朱服武冠。其以此官為千人。司馬道賁督已上。及司馬。皆假獸頭鞞。已上
 陳制。梁無所及不同者。陞長甲。僕射主事吏。將騎廷上五牛旗。假吏。武賁

在陛列。及備鹵簿。服錦文衣。武冠。駝尾。陛長者。假獸頭鞶。假旄頭。羽林
在陛列。及備鹵簿。服絳單衣。上著韋畫腰襦。假旄頭。輿輦迹禽前驅由基。
強弩司馬。給降科單衣。武冠。其本位。佩武猛都尉已上。別部司馬已下。並
獸頭鞶。殿中冗從武賁。殿中武賁。持鉞戟。冗從武賁。假青綬。絳科單衣。
武冠。陳令。絳科單衣。其本位職。佩武猛都尉等印。假鞶綬。依前條。持雄斧。
武騎。武賁五騎。傳詔武賁。殿中羽林太官。嘗食武賁。稱飯宰人。諸官嘗食
武賁。給降構。武冠。其佩武猛都尉等位印。皆依上條。假鞶綬之例。其在陛
列。及備鹵簿。五騎武賁。服錦文衣。駝尾。宰人服離支衣。領軍捉刃人。烏總
帽。袴褶皮帶。絰是羽葆。鼙鼓吹。悉改著進賢冠。外給系鼙鼓吹。著武冠。
諸官鼓吹。尚書廊下。都坐門下。使守藏守閤。殿中威儀騶。武賁常直殿門。
雲龍門者。門下左右部武賁。羽林騶。給傳事者。諸導騶。門下中書守閤。尚
書門下武賁。羽林騶。蘭臺五曹節藏。僕射廊下守閤。威儀發符騶。都水使
者。廊下守給騶。謁者威儀騶。諸官謁者騶。絳構。武冠。衣服如舊。大誰天門
士。早科單衣。樊噲冠。衛士涅布構。却敵冠。諸將軍使。持節都督執節史。
朱衣。進賢一梁冠。自此條已下。皆陳制梁所無。持節節史。單衣介幘。其纂
戎戒嚴時。同使持節制。假節節史。單衣介幘。凡節跌以石為之。持節皆刻

為鞏螭形。假節及給蠻夷節。皆刻為狗頭。諸王典籤。帥單衣平巾幘。典籤書吏。袴褶平巾幘。諸王書佐。單衣介幘。公府書佐。朱衣進賢冠。諸王國舍人。司理謁者。閣下令史中衛。都尉。朱衣。進賢一梁冠。司理假銅印。謁者。高山冠。令史。已下武冠。太子太傅。五官功曹主簿。早朝服。進賢一梁冠。太子二傳。門下主記。錄事功曹。書佐。門下。書佐。記室。帳下。督都督省事。法曹。書佐。太傅外都督。早衣。進賢一梁冠。太子妃家令。絳朝服。進賢一梁冠。太子三校。二將。積弩殿中將軍。衣服皆與上宮官同。太子正負司馬。督題閣監。銅印墨綬。三校內王事主章。扶持守舍人。衣帶仗局。服飾衣局。珍寶朝廷。主衣。統奏事。幹內局。內幹。朱衣武冠。諸公府御屬。及省事。錄尚書省事。太子門下。及內外監丞。典事導客。竿書吏。次功典書。函。典書。典經。五經典書。諸守宮舍人。市買清慎。食官督內直兵吏。宣華崇賢二門舍人。諸門吏。朱衣。進賢一梁冠。太子妃傳令。朱衣武冠。執刀烏信幡。太子二傳。騎吏。玄衣赤幘。武冠。常行則袴褶。執儀齋帥。殿帥。典儀帥。傳令。執刀戟。主蓋扇。麾繖。殿上持兵車郎。扶車注疏。萌床齋。閤食司馬。唱導飯。主食殿前帥。殿前威儀。武賁。威儀散給使。閤將。鼓吹士帥。副。武冠。絳構。案。軹。小輿。持車。輅車。給使。平巾幘。黃布袴褶。赤罽帶。左右衛。左右武衛。左

右武侯大將軍。領左右大將軍。並武弁。絳朝服。劔佩綬。侍從則平中幘。紫衫。大口袴褶。金玳瑁裝兩檔甲。唯左右武衛大將軍。執赤檀杖。左右衛。左右武衛。左右武侯將軍。領左右將軍。左右監門衛將軍。太子左右衛。左右宗衛。左右內等率。左右監門郎將。及諸副率。並武弁。絳朝服。劔佩綬。侍從則平中幘。紫衫。大口袴。金裝兩檔甲。唯左右武衛將軍。太子左右宗衛。率執白檀杖。直閤將軍。直寢直齋。太子直閤。武弁。絳朝服。劔佩綬。侍從則平中幘。絳衫。大口袴褶。銀裝兩檔甲。隋文始服黃。百官常服同公。庶人皆着黃袍。帝朝服亦如之。但以十三環為異也。文獻通考致堂胡氏曰。服章之設。所以辨上下。定民志也。莫卑乎民。莫尊乎天子。而服同一色。上下無所辨。民志何由定。僭亂由此而生矣。古之聖王。自奉儉約。惡衣菲食。而事天地宗廟。臨朝廷。百官則等級分明。故冕十有二章。黻珽幅舄。衡紘紕。以昭其度。藻率鞞鞶。鞶屬游纓。以昭其數。威儀尊重。禮無與二。然後人主之勢隆。非廣已以造大。理當然也。故晏平仲為大國之卿。一狐裘三十年。澣衣濯冠。以朝。君子譏其隘。曰難乎其為下也。隋文儉約。施之官閭之中。燕私之用可也。與庶人同服。而坐乎廟朝。儉不中禮。不足以為法矣。隋書何稠傳。大業初。煬帝將幸揚州。謂稠曰。今天下大定。朕承洪業。服章文物。

闕畧猶多。卿可討閱圖籍。營造輿服羽儀。送至江都也。其日拜太府少卿。稠於是營黃麾三萬六千人仗。及車輿輦輅。皇后鹵簿。百官儀服。依期而就。送于江都。所役工十餘萬人。用金銀錢物鉅億計。帝使兵部侍郎明雅選部郎薛遇等。勾覈之。數年方竟。毫釐無舛。稠叅會今古。多所改創。魏晉已來。皮弁有纓而無笄導。稠曰。此古田獵之服也。今服以入朝。宜變其制。故弁施象牙簪導。自稠始也。又後省之服。初無珮綬。稠曰。此乃晦朔小朝之服。安有人臣謁帝而去印綬。兼無佩玉之節乎。乃加獸頭小綬。及珮一隻。舊制。五輅於轅上起箱。天子與叅乘同。在箱內。稠曰。君臣同所。過為相逼。乃廣為盤輿。別構欄楯。侍臣立於其中。內復起須彌平坐。天子獨居其上。自餘麾幢文物。增損極多。新唐書車服志。具服者五品以上。陪祭朝享。拜表大事之服也。亦曰朝服。冠幘簪導。絳紗單衣。白紗中單。黑領襖。黑標襪。裾。白裙襦。革帶金鈎。假帶曲領。方心絳紗蔽膝。白鞞烏皮馬。劔紛鞞囊。雙綬。六品以下。去劔佩綬。七品以上。以白筆代簪。八品九品。去白筆。白紗中單。以履代馬。開元二十五年。御史大夫李適之建議。冬至元日。大禮朝參官。及六品清官。服朱衣。六品以下。通服袴褶。天寶中。御史中丞吉溫建議。京官朔望朝參。衣朱袴褶。文獻通考。德宗貞元十五年。膳部郎中歸

崇敬。以百官朔望朝服袴褶。非古禮。上疏云。按三代典禮。兩漢史籍。並無
袴褶之制。亦未詳所起之由。隋代以來。始有服者。請罷之。詔可。按袴褶
魏晉以來。以為車駕親戎中外。戒嚴之服。晉制雖有其說。而不言其制。然
既曰戒嚴服之。必戎服也。至隋煬帝時。巡遊無度。詔百官從行服袴褶。軍
旅間不便。遂令改服戎衣。為紫緋綠青之服。則所謂袴褶者。又似是褒衣
長裾。非鞍馬征行所便者。與戒嚴之說不類。唐時以袴褶為朝見之服。開
元以來。屢勅百官朝參應服袴褶。而不服者。令御史糾彈治罪。蓋以為六
品以下之通服。韻書訓褶為袴。又為袷也。然袴裳也。袷衣之交領也。則不
知所謂袴褶者一物乎。二物乎。唐輿服志。群臣服條內。有緋褶大口袴。則
似是二物。然不知所謂緋褶者。衣乎裳乎。當俟精識考古之士而訂之。
復攷畢仲衍中書備對冕服條下。袴褶。注云紫緋綠。各從本服。白綬中單。
白羅方心曲領。白綾袴。本品官尊駕。則騎而從之。詳其說。所謂紫緋綠。即
後來之公服。而非祭服朝服也。祭服青衣。朝服緋衣。不分紫緋綠三等。但
所謂白綬者。今之公服所無。而中單白羅方心曲領。後之夜公服者。亦未
嘗服之。蓋古人盛服。必有中單。冕弁朝祭之服。皆有之。多以白為之。而緣
以朱繡之屬。意公服之初制。亦必有此。後來流傳既久。寢從簡便。而朝服

之裏所衣者。非中單。乃流俗不經之服。如所謂紫袍皂褙之類是也。舊唐書昭宗紀。龍紀元年十一月辛亥。上宿齋於武德殿。宰相百寮朝服于位。時兩軍中尉。楊復恭。及兩樞密皆朝服侍上。太常博士錢珣。李綽等。奏論之曰。皇帝赴齋宮。內臣皆服朝服。臣檢國朝故事。及近代禮令。並無內官朝服助祭之文。伏惟皇帝陛下。承天御曆。聖祚中興。祇見宗桃。克陳大禮。皆稟高祖太宗之成制。必循虞夏商周之舊經。軒冕服章。式遵彛憲。禮院先准大禮使牒。稱得內侍省牒。要知內臣朝服品秩。禮院已准禮令報訖。今參詳近朝事例。若內官及諸衛將軍。必須製冠服。即各依所兼正官。隨資品依令式。服本官之服。事存傳聽。且可俯從。然亦不分明。著在禮令。伏乞聖慈。允臣所奏。狀入。至晚不報。錢珣又進狀曰。臣今日已時進狀。論內官冠服制度。未奉聖旨。伏以陛下度事郊禋。式遵彛範。凡開典禮。必守憲章。今陛下行先王之大禮。而內臣遂服先王之法服。來日朝獻大聖祖。臣贊導皇帝行事。若侍臣服章有違制度。是為非禮。上瀆祖宗。臣期不奉勅。臣繆當聖代。叨備禮官。獲正朝儀。死且不朽。脂膏泥滓。是所甘心。狀入。降朱書御札曰。卿等所論至當。事可從權。勿以小瑕。遂妨大禮。於是內四臣遂以法服侍祠。宋史輿服志。朝服一曰進賢冠。二曰貂蟬冠。三曰獬豸冠。

皆朱衣朱裳。宋初之制。進賢五梁冠。塗金銀花額。犀玳瑁簪導立筆。緋羅袍。白花羅中單。緋羅裙。緋羅蔽膝。並皂縹襖。白羅大帶。白羅方心曲領。玉劔佩。銀革帶。暈錦綬。二玉環。白綾鞞。皂皮履。一品二品侍祠朝會。則服之。中書門下。則冠加籠巾。貂蟬三梁冠。犀角簪導。無中單。銀劔佩。師子錦綬。銀環。餘同五梁冠。諸司三品御史臺。四品兩省。五品侍祠朝會。則服之。御史大夫中丞。則冠有獬豸。角衣有中單。兩梁冠。犀角簪導。銅劔佩。練鵲錦綬。銅環。餘同三梁冠。四品五品侍祠朝會。則服之。六品以下。無中單。無劔佩。御史。則冠有獬豸。角衣有中單。袴褶。紫緋綠。各從本服色。白綾中單。白綾袴。白羅方心曲領。本品官導駕。則騎而服之。袴褶之制。建隆四年。范質與禮官儀袴褶制度。先儒無說。惟開元雜禮有五品以上用細綾及羅。六品以下用小綾之制。注。褶衣複衣也。又案令。文武弁金飾。平巾幘簪導。紫褶白袴。玉梁珠寶鈿帶鞞。騎馬服之。金飾。即附蟬也。詳此。即是二品三品所配弁之制也。附蟬之數。蓋一品九。二品八。三品七。四品六。五品五。又侍中中書。今散騎。加貂蟬。侍左者左珥。侍右者右珥。又開元禮。導駕官並朱衣。冠履依本品。朱衣。今朝服也。故令文三品以上紫褶。五品以上緋褶。七品以上綠褶。九品以上碧褶。並白大口袴。起梁帶。烏皮鞞。今請造袴褶。

如今文之制。其起梁帶形制。檢尋未是。望以革帶代之。奏可。是歲造成而未用。乾德六年。郊禋始服。而冠未造。乃取朝服。進賢冠。帶鞮履。參用焉。

元豐元年。詳定禮文。所言古者朝祭異服。所以別事神與事君之禮。今皇帝冬至及正旦御殿。服通天冠。絳紗袍。則百官皆服朝服。乃禮之稱。至親祠郊廟。皇帝嚴裘冕以事神。而侍祠之官。止以朝服。豈禮之稱哉。至於景靈宮。分獻官皆服朝服。尤為失禮。伏請親祠郊廟。景靈宮。除導駕贊引宿衛之官。其侍祠及分獻者。並服祭服。從之。宋會要仁宗景祐三年。十月十九日。御史臺言。準詔。皇親諸司使以下。除西班官百三十餘員。並隸本臺班簿。凡侍祠大朝會。大將軍至副率。各依本品朝服。宜下有司施行。詔禮院檢詳典故。報三司製造。康定二年十月。少府監言。每大禮朝服。法物庫定。百官品位支給朝服。今朝班內有官卑品高。及官高品卑者。難為臨時參定。或恐差舛。有違典禮。望下禮院。詳定百官朝服等第。令本庫依官品支給。詔禮院參酌舊制。禮院言。準衣服令。五梁冠。犀簪。導珥筆。朱衣朱裳。白羅中單。並阜標襖。方心曲領。大帶。革帶。蔽膝。隋羅色。玉裝劍。玉佩。錦綬。間施二玉環。白襪。烏皮履。一品二品侍祠大朝會。則服之。中書門下。則加籠中貂蟬。準官品令。一品尚書令。太師。太傅。太保。太尉。司徒。司空。太子

太傅。太保。二品。中書令。侍中。左右僕射。太子少師。少傅。少保。諸州府牧。左
右金吾衛上將軍。又準閣門儀制。以中書令。侍中。同中書門下平章事。為
宰相。樞密使。留守節度使。京尹。兼中書令。侍中。同中書門下平章事。
為使相。樞密使。知樞密院事。參知政事。樞密副使。同知樞密院事。宣徽南
北院使。簽書樞密院事。並在東宮三師之上。以上品位職事。請準上條給
朝服。宰臣使相。則加籠巾。貂蟬。其散官勳爵。不繫品位。止從正官。後條餘
品。准此。又准衣服令。三梁冠。犀簪導。白紗中單。銀劍。佩銀環。餘同五梁冠。
諸司三品。御史臺四品。兩省五品。侍祠大朝會。則服之。近制並有中單。御
史中丞。則冠獬豸。准官品令。諸司三品。諸衛上將軍。六軍統軍。諸衛大將
軍。神武龍武大將軍。太常宗正卿。秘書監。光祿衛尉。太僕。大理。鴻臚。司農。
太府卿。國子祭酒。殿中少府。將作司。天監。諸衛將軍。神武龍武將軍。下都
督。三京府尹。五大都督。府長史。親王。傳。御史臺三品。四品。御史大夫。御史
中丞。兩省三品。四品。五品。左右散騎常侍。門下中書侍郎。諫議大夫。給事
中。中書舍人。尚書省三品。四品。六尚書。左右丞。諸行侍郎。東宮三品。四品。
太子賓客。太子詹事。太子左右庶子。太子少詹事。太子左右諭德。又準閣
門儀制。節度使。文明殿學士。資政殿學士。三司使。翰林學士承旨。翰林學

士。資政殿學士。端明殿學士。翰林侍讀學士。侍講學士。龍圖閣學士。樞密
 直學士。龍圖閣直學士。並次。中書侍郎。節度觀察留後。並次。諸行侍郎。知
 制誥。龍圖天章閣待制。觀察使。並次。中書舍人。內客省使。次。太府卿。客省
 使。次。將作監。引進使。防禦團練三司副使。並次。左右庶子以上。品位職事。
 請準上條給朝服。又準衣服令。兩梁冠。銅劍珮環。餘同三梁冠。四品五品。
 侍祠大朝會。則服之。六品則去劍珮。御史則冠獬豸。衣有中單。準官品
 令。諸司四品。太常宗正少卿。秘書少監。光祿等。七寺少卿。國子司業。殿中
 少府。將作司。天少監。三京府少尹。太子率更令。家令僕。諸衛率。府率。副率。
 諸軍衛中郎將。諸王府長史。司馬。大都督府。左右司馬。內侍尚書省。五品
 左右司。諸行郎中。諸司五品。國子博士。五經博士。太子中允。左右贊善大
 夫。都水使者。開封祥符。河南洛陽宋城縣令。太子中舍。洗馬。內常侍。太常
 宗正。秘書殿中丞。著作郎。殿中省五尚奉御。大理正。諸王友。諸軍衛郎將。
 諸王府諮議參軍。司天五官正。太史令。內給事。諸陞朝官。六品以下起居郎。
 起居舍人。侍御史。尚書省諸行員外郎。殿中侍御史。左右司諫。左右正言。監察
 御史。太常博士。通事舍人。又準閣門儀制。四方館使。次。七寺少卿。諸州刺
 史。次。太子僕。謂正任不帶使職者。東西上閣門使。次。司天少監。客省引進

閣門副使。並次。諸行員外郎以上。品位職事。據令文。但言四品五品。亦不分班叙上下。今請自尚書省五品以上。及諸州刺史以上。準上條給朝服。其諸司五品以上。實有官高品卑。及品高官卑者。合自諸司五品。國子博士。至內給事。並依六品以下例去劔珮綬。御史則冠獬豸。衣有中單。其諸司使副使以下。至閣門祗候。如有攝事合請朝服者。並同六品。詔從之。神宗元豐二年四月二十三日。詳定正旦御殿儀注所言。按周以上祭服。無劔而有履。故周官司服之職。悉不著劔。惟朝服則有容刀。詩曰。韞琫容刀是也。冬官桃氏為劔。止以共武士服。若帶劔以祠郊廟。以朝天子。非古也。自秦及西漢。艱危用武之時。朝祭服皆佩劔。東漢大祭祀。玉佩絢履以行事。惟朝尚佩劔。晉制服。劔以木代之。謂之班劔。東齊謂之象劔。今冬正大朝會。若服三代之冕服。而用三代之禮。則去劔可也。若服秦漢之服。而用秦漢之禮。則存劔可也。然文武異容佩劔之制。不當施於朝事。又周禮以不脫屨為恭。以脫屨為相親。少儀曰。凡祭於室中堂上無跣。燕則有之。注曰。祭不跣者。主恭也。燕則有跣為歡也。特牲少牢饋食之禮。無脫屨。而燕與鄉飲酒之禮。則有脫屨升堂。與少儀令自秦以下冠服雖異。于周猶坐于席。未坐于席。則劔不可以不解。屨不可以不脫。解劔脫屨于至尊之

前則愈不恭矣。故將升堂。必解劔脫履也。其後相承既久。遂以解劔脫履為恭。與古益異。今冬正朝會。若用周禮。則服當無劔。而惟燕坐然後脫履而升。若止襲秦漢之故。則因舊儀為可。又恐佩劔而趨朝。脫履而示恭。與三代禮意不合。其冬正朝會。欲乞約用周禮。不服劔。不脫履。從之。八月二十九日。詳定朝會儀。注所言。周禮。天子眡朝。則皮弁。服十五升衣。積素以為裳。記所謂皮弁素積是也。諸侯眡朝。則委貌冠。其服緇布衣。亦積素以為裳。詩所謂緇衣之宜兮是也。凡在朝。君臣同服。漢氏承秦。改六冕之制。但玄冠絳衣而已。魏以來名為五時朝服。隋唐謂之具服。一品以下。九品以上。皆絳紗禪衣。其冠有五梁。三梁。二梁。一梁之別。隋志曰。梁別貴賤。自漢始也。綬則以組為之。本以貫佩玉相承受。戰國尚武而去佩。但留其繫璫。而秦乃以采組連於璫。轉相結受。因以為飾。所謂綬也。韋彤五禮精義曰。綬以別尊卑。彰有德。故漢制相國至百石吏。綬有三采。二采。一采之等。然則冠以祭之多少別貴賤。綬以采之麤縵異尊卑。其來尚矣。古者制禮。上物不過十二。天之數也。自上而下。降殺以兩。畿外諸侯。遠於尊者。而伸則以九。以七。以五。從陽奇之數。王朝公卿大夫。近於尊者。而屈則以八。以六。以四。從陰偶之數。本朝衣服令。通天冠。二十四梁。為乘輿服。蓋二十

四梁。以應冕旒前後之數。若人臣之冠。則自五梁而下。與漢唐少異矣。至於綬。則乘輿及皇太子以織成。諸臣用錦為之。一品二品冠五梁。中書門下加籠中貂蟬。諸司三品三梁。四品五品二梁。御史臺四品。兩省五品。亦三梁。而綬有暈錦。黃師子。方勝。練鵲。四等之殊。六品則去劍佩綬。隋唐冠服皆以品為定。蓋其時官與品輕重相準故也。今之令式。尚或用品。雖因襲舊文。然以官言之。頗為舛謬。槩舉一二。則太子中允。贊善大夫。與御史中丞同品。太常博士。品卑於諸寺丞。太子中舍。品高於起居郎。內常侍。纔比內殿崇班。而在尚書諸司郎中之上。是品不可用也。若以差遣。則有官卑而任要劇者。有官品高而處冗散者。有一官而兼領數局者。有徒以官奉朝請者。有分局莅職。特出於一時。隨事立名者。是差遣又不可用也。以此言之。用品及差遣。定冠綬之制。則未為允當。伏請以官為定。庶名實相副。輕重有準。仍乞分官為七等。冠綬亦如之。貂蟬籠巾七梁冠。天下樂章。暈錦綬。為第一等。蟬舊以玳瑁為胡蝶狀。今請改為黃金附蟬。宰相親王使相三師三公服之。七梁冠。雜花暈錦綬。為第二等。樞密使知樞密院。至太子太保服之。六梁冠。方勝。宜男錦綬。為第三等。左右僕射。至龍圖天章寶文閣直學士服之。五梁冠。翠毛錦綬。為第四等。左右散騎常侍。至殿中

少府。將作監服之。四梁冠。簇四雕錦綬。為第五等。客省使至。諸行郎中服之。三梁冠。黃師子錦綬。為第六等。皇城以下諸司使。至諸衛率府率服之。內臣自內常侍以上。及入內省。內侍省內。東西頭供奉官。殿頭前班。東西頭供奉官。左右侍禁。左右班。殿直京官。祕書郎。至諸寺監主簿。既預朝會。亦宜朝服從事。今參酌自內常侍以上。冠服各從本等寄資者。如本官入內。內侍省內。東西頭供奉官。殿頭三班。使臣陪位京官。為第七等。皆二梁冠。方勝練鵲錦綬。高品以下服色。依古者鞞鞞屨。並從裳色。今制朝服用絳衣。而錦有十九等。其七等綬。謂宜純用紅錦。以文采高下為差別。惟法官綬。用青地荷蓮錦。以別諸臣。後漢志。法官一日柱。後執法者服之。侍御史廷尉正監平也。或謂之獬豸冠。南齊志。亦曰法冠。廷尉等諸執法者冠之。今御史臺自中丞而下。至監察御史。大理卿。少卿。丞。審刑院。刑部主判官。既正定厥官。真行執法之事。則宜冠法冠。改服青荷蓮錦綬。其梁數與佩準本官從之。按周禮司服。王眡朝。則皮弁服。鄭氏注。視朝。視內外朝之事。王受諸侯朝覲於廟。則衮冕。賈公彥曰。覲禮。天子衮冕。負黼。故知朝覲在廟。王服衮冕。若然。春夏受摯在朝。則皮弁服。故孔穎達曰。天子朝服立於路門之外。諸侯朝服執摯入應門。漢制。百官賀正月。天子服通

天冠。張衡東京賦曰。冠通天。佩玉璽。韋彤五禮精義曰。通天冠。朝會之正服。猶古之皮弁也。自晉以來。天子郊祀天地。明堂宗廟元會。臨軒介憤。通天冠平冕。皐表朱緣裏。加於通天冠上。衣畫而裳繡。為日月星辰十二章。自此元日受朝。始用祭服。梁及隋唐。既以因襲。而本服之制。亦用袞冕。臣等看詳周禮朝覲。若春夏受摯於朝。則君臣皆朝服。秋冬受摯於廟。則君臣皆祭服。今元會行禮於朝。而天子服祭服。群臣服朝服。未合禮意。欲乞元日受朝。賀服通天冠。絳紗袍。從之。元豐五年十二月十一日。詔冬正朝會。諸軍所服衣冠。廂都軍都指揮使。都虞候領團練使。刺史服第五等。軍都指揮使。都虞候服第六等。指揮使。副指揮使。服第七等。並班於庭。副都頭以上常服。班殿門外。二十三日。吏部尚書李清臣奉詔檢閱朝會應奉事。欲令執事高品以下。並服介憤絳服。大帶革帶。襪履方心曲領。從之。六年九月二十八日。尚書禮部言樞密都承旨張誠一言。伏見朝服法物庫有太常協律郎。太樂丞。新給袴褶冠。今檢諸書志。唯袴褶之制未詳所起。代車駕親戎中外。戒嚴則服之。唐制三品以上紫褶。五品以上緋褶。七品以上綠褶。九品以上碧褶。九品以下通用細綾。七品以下通用小綾。及檢會鹵簿記。止有鼓吹令丞冠。注。漆皮為之。兩耳鑊花形。如三禮圖委貌冠。今俗謂

之袴褶冠。收載庫籍。即無所據。乞下禮官考正。下太常寺。太常寺言。袴褶乃是從戎之服。以此名冠。尤無所據。今協律郎如押樂。太常卿遇祠祭朝會。各以本品朝祭冠服從事。兼太樂令丞。今止服本品官服。其袴褶並合不用。從之。曹尚書侍郎。殿中監。大司成。散騎常侍。特進。金紫。銀青光祿大夫。太尉。節度使。左右金吾衛。左右衛上將軍服之。能改齋。漫錄。政和元年十二月戊戌詔。自今後導駕官並朝服。結佩。應親祠除服外。餘並朝服。不得常服。宋史。政和三年四月。議禮局。更上群臣朝服之制。七梁冠。金塗銀稜。貂蟬。籠巾。犀簪。導。銀立筆。朱衣裳。白羅中單。並早標。襪。蔽膝。隨裳色。方心曲領。緋白羅大帶。金塗銀革帶。金塗銀裝玉佩。天下樂。暈錦綬。青絲網。間施三玉環。白鞞。黑履。三公。左輔。右弼。三少。太宰。少宰。親王。開府儀同三司服之。七梁冠。無貂蟬。籠巾。銀裝玉佩。雜花暈錦綬。餘同三公以下服。執政官。東宮三司服之。六梁冠。白紗中單。銀革帶。佩方勝。宜男。錦綬。銀環。餘同七梁冠服。大學士。學士。直學士。東宮三少。御史大夫。中丞。六曹尚書侍郎。殿中監。大司成。散騎常侍。特進。金紫。銀青光祿大夫。光祿大夫。太尉。節度使。左右金吾衛。左右衛上將軍服之。五梁冠。翠毛錦綬。餘同六梁冠服。太子賓客。詹事。給事中。中書舍人。諫議大夫。待制。九寺卿。大司樂。祕書監。

殿中少監。國子祭酒。宣奉。正奉。通奉。通議。太中。中大夫。中奉。中散。大夫。上將軍。節度觀察。留後觀察使。通侍大夫。樞密都承旨。服之。四梁冠。簇四盤。鵬錦綬。餘同五梁冠服。九寺少卿。大晟典樂。祕書少監。國子辟廱司業。少府將作軍器監。都水使者。起居舍人。侍御史。太子左右庶子。詹事。諭德。尚書左右司郎中。負外。六曹諸司郎中。朝議奉直。朝請。朝散。朝奉大夫。防禦團練使。刺史。大將軍。正侍中。侍中。亮。中尉。拱衛。左武。右武。大夫。駙馬都尉。帶遙郡武功大夫以下。樞密副都承旨。服之。三梁冠。金塗銅革帶。佩黃獅子錦綬。鍮石環。餘同四梁冠服。殿中侍御史。監察御史。司諫。正言。尚書六曹。負外郎。外符寶郎。少府將作軍器少監。太子侍讀。侍講。中舍舍人。親王府翊善。侍讀。侍講。九寺祕書。殿監。辟廱丞。大晟樂令。兩赤縣令。大理正。司直。評事。著作郎。祕書郎。著作佐郎。太常宗學。國子辟廱博士。太史局令。正丞。五官正。朝請。散朝。奉承議。奉議。通直郎。中亮。中衛。拱衛。左武。右武。郎。諸衛將軍。率。府率。武功。武德。武顯。武節。武畧。武經。武義。武翼。大夫郎。醫職。翰林。醫正。以上。內符寶郎。閣門通事舍人。敦武郎。修武郎。服之。二梁冠。角簪。方勝。練鵲。錦綬。餘同三梁冠服。在京職事官。閣門祗候。看班。祗候。率。府副率。升輦。輅立侍。內臣服之。御史大夫。中丞。刑部尚書。侍郎。大理卿。少卿。御

史。刑部郎中。大理寺正丞。司直評事。並冠獬豸冠服。青荷蓮綬。詔悉領行。七年詔。夏祭百官朝祭服用紗。中興乃舊制行事。執事官則服祭服。導引陪祠則服朝服。從紹興五年。太常寺請也。祀畢。駕回。若服通天絳紗袍。乘大輦。則百官從。駕服朝服。或服履袍。乘平輦。則百官從服常服。自隆興二年。洪适請始也。進賢以漆布為之。上縷紙為額花。金塗銀銅飾。後有納言。以梁數為差。凡七等。以羅為纓結之。第一等七梁。加貂蟬籠巾。貂鼠尾立筆。第二等無貂蟬籠巾。第三等六梁。第四等五梁。第五等四梁。第六等三梁。第七等二梁。並如舊制服同。貂蟬冠。一名籠巾。織藤漆之。形正方。如平中幘。飾以銀。前有銀花。上綴玳瑁蟬。左右為三小蟬。銜玉鼻。左挿貂尾。三公親王。侍祠大朝會。則加于進賢冠而服之。獬豸冠。即進賢冠。其梁上刻木為獬豸角。碧粉塗之。梁數從本品。立筆。古人臣簪筆之遺象。其制削竹為幹。裏以緋羅。以黃絲為毫。拓之。銀縷葉挿於冠後。舊令文官七品以上。服朝服者。簪白筆。武官則否。今文武皆簪焉。聖賢言行故事。宋王丞相。溥父祚。累遷宿州防禦使。去音既老。退居洛陽。溥為相。客候祚。候問其父起居。溥常朝服侍立。客不安席。求去。祚曰。學生勞賢者。起避邪。父稱子曰。學生。稱客曰賢者。遼史太祖丙寅歲。即皇帝位。朝服衷甲。以備非常。其後行

瑟瑟禮。大射柳。即此服。聖宗統和元年。冊承天皇后。給三品以上。用漢法服。三品以下。用大射柳之服。皇帝服。實里薛袞。冠給縫。紅袍垂飾。犀玉帶。錯絡縫鞞。謂之國服。袞冕。太宗更以錦袍金帶。臣僚戴氈冠。金花為飾。或加珠玉翠毛。額後垂金花。織成夾帶。中貯髮一總。或紗冠。制如烏紗帽。無簷不擗。雙耳額。前綴金花。上結紫帶。末綴珠。服紫窄袍。繫鞞鞞帶。以黃紅色條。裏革為之。用金玉水晶。靛石綴飾。謂之盤紫。太宗更以錦袍金帶。會同元年。群臣高年有爵秩者。皆賜之。皇帝翼善冠。朔視朝用之。拓黃袍。九環帶。白練裙襦。六合鞞。一品以下。五品以上。冠幘。纓簪導。謁見東宮。及餘公事服之。絳紗單衣。白裙襦。帶鈎。假帶方心鞞履。紛鞞囊。六品以下。冠績纓簪導。去紛鞞囊。餘並同。禮志。賓儀。燕京嘉寧殿。西京同文殿。朝服。僕頭袍。笏。公服。紫衫帽。乾亨五年。聖宗冊承天太后。給三品以上法服。雜禮。冊承天太后儀。侍中。就席解劔。脫履。重熙五年。尊號冊禮。皇帝服龍袞。北面。臣僚並朝服。蓋遼制。會同中。太后北面。臣僚國服。皇帝南面。臣僚漢服。乾亨以後。大禮。雖北面。三品以上。亦用漢服。重熙以後。大禮。並漢服矣。常朝。仍遵會同之制。金史。臣下朝服。凡尊駕及行大禮。文武百官皆服之。正一品。貂蟬籠中。七梁額花冠。貂鼠立筆。銀立筆。犀簪導。佩劔。緋羅大

袖。緋羅裙。緋羅蔽膝。各一。緋白羅大帶。天下樂暈錦。玉環綬一。白羅方心
 曲領。白紗中單。銀褐勒帛各一。玉珠佩二。金塗銀革帶。烏皮履。白綾襪。正
 二品七梁冠。銀立筆。犀簪。尊不佩劔。緋羅大袖。雜花暈錦。玉環綬。餘並同。
 正四品五梁冠。銀立筆。犀簪。白獅錦。銀環綬。珠佩。銀革帶。御史中丞。則獬
 豸冠。青荷蓮綬。餘並同。正五品四梁冠。簇四金鷗錦。銅環綬。銀珠佩。餘並
 同。正六品至七品。三梁冠。黃獅錦。銅環綬。珠佩。銅束帶。餘並同。大定二十
 二年。祿享攝官。尊駕。二品冠七梁。三品四品冠六梁。服有金花。五品冠五
 梁。六品冠四梁。七品冠三梁。監察御史獬豸冠。青綬。八品九品冠二梁。餘
 製並同。元史。泰定紀。泰定元年。十二月丙寅。勅內外百官。凡行朝賀等禮。
 雨雪免朝服。張文忠公集。濟南安氏家傳。朝服記。吾鄉貴族顯室甚衆。
 然卒不過一傳。再傳遂衰替。如編氓者。比有之。大抵積德深者。其享世也
 遠。積德淺者。其享世也近。謂天不可必者。然乎哉。或曰。跖何積而延。回何
 拂而促。非天不可必歟。嗚呼。蓋不知善焉。而慶者理之常。惡焉。而禍不及
 者。偶然耳。故君子以跖之年為幸。回之年為不幸。則天之昭昭者。可見
 矣。今夫農者之於稼。人力至焉。地利盡焉。則所獲必多。耕以鹵莽。而耘以
 鹵莽。則所獲必少。雖然。良農惟知盡力。士君子惟知脩己。至於豐歉禎咎。

則有所不屑屑焉。人而知此。則其為善之心定矣。余隣居有安氏者。其曾祖曰圭。三子曰伸。曰僖。曰倨。伸子惟湛。僖子惟洪。倨子惟演。湛子景良。洪子景賢。或中。或外。皆有祿焉。若緋。若紫。若青。一門而三等之服皆備。嗚呼。非其先世陰騭有素。克重光累徽。駢榮聯秀。爾耶。一日景良過余曰。我先大父嘗以緋傳先伯父。伯父傳兄景范。景范今傳於僕。一朝服而父子兄弟三世四傳。亦今所不多見也。幸子一言紀之。用勗我后人。余識安氏祖子孫凡三世。因謂昔唐魏鄭公笏傳子若孫。史冊書之。迄今赫赫若前日事。今君所傳。殆類是歟。雖然。夫能世其物者。不若能世其德。世其物。則有時而究。世其德。則滋久。滋著矣。吾聞令先祖襟度坦夷。博涉多通。喜交天下名士。甫出五十。即致政家居。以琴書自樂。在鄉里祥容輒語。唯恐傷人。人百負之。一無所校。大抵愧心之行。過分之榮。非義之富。平生舉未始有位。不滿德。美必酬焉。且夫流澤子孫。冠裳奕葉。繼繼繩繩。不一再而止也。景良誠因先世之服。懋修乃德。俾後之嗣者。又能以景良之心為心。雖十世百世。其前人之芳。可必不墜。詐止章服之華而已哉。於是景良憮然曰。公之此言。僕當世守之。遂書以為安氏家傳朝服記。宋劉後村詩蒙仲唱第歸。約朝服相見。向來襜被出關時。恩大身猶草芥微。僅有兩生携酒

送不如二諫得詩歸。負揚臨賀滔滔是。客衛將
軍落落稀。老接親朋惟野服。寄聲夷甫莫朝衣。

永樂大典卷之一萬九千七百九十

重錄總校官侍郎臣陳以勤

學士臣王大任

分校官編修臣陶大臨

書寫儒士臣劉大孝

圈點監生臣徐浩

臣管希仲

1	2	3	4	5
6	7	8	9	10
11	12	13	14	15
16	17	18	19	20
21	22	23	24	25
26	27	28	29	30
31	32	33	34	35
36	37	38	39	40
41	42	43	44	45
46	47	48	49	50
51	52	53	54	55
56	57	58	59	60
61	62	63	64	65
66	67	68	69	70
71	72	73	74	75
76	77	78	79	80
81	82	83	84	85
86	87	88	89	90
91	92	93	94	95
96	97	98	99	100

No 5949
 39 folios May 1901 66



Or. ~~56 d.~~
61 d



